


墓誌銘

西堂集
九



西堂先生集墓誌銘卷之二目錄

贈

大司諫曹參判李公

墓誌銘

禮曹判書金公墓誌銘

進士尹公墓誌銘

議

政府右議

政趙公墓誌銘

外舅

通德

郎姜公墓誌銘

崔而順墓誌銘

工曹判書李公墓誌銘

崔祉興墓誌銘

淑人林氏墓誌銘

禮曹叅判黃公墓誌銘

亡兒墓誌銘

趙同知墓誌銘

司

憲府

監察李公墓誌銘

兵曹正郎沈君墓誌銘

處士鄭公墓誌銘

修撰呂公墓誌銘

恭人韓氏墓誌銘

貞敬夫人田氏墓誌銘

贈貞敬夫人李氏墓誌銘

長城府使李公墓誌銘

同知中樞事府李公墓誌銘

龍驤衛副護軍林公墓誌銘

郡夫人崔氏墓誌銘

忠清道觀使徐公墓誌銘

贈吏曹叅議權公墓誌銘

淑夫人豐壤趙氏墓誌銘

貞夫人林氏墓誌銘

西堂先生集墓誌銘卷之二

贈吏曹叅判行大司諫李公墓誌銘

公諱鳳年字

韓山之李肇自麗之中世至牧隱

父子始大公其後也公三歲而孤自傷不識父顏終身慕不衰嘗聽人讀諺書有三歲喪父事頗與已相類聽未已流涕汎瀾在旁者不忍見後遂廢而不讀以不克逮事先考者推而事母夫人愉愉翼翼不違其志壬戌擢司馬除翼陵叅奉己卯又擢增廣文科旋罷其榜除童蒙教官以明陵董役勞陞拜瓦署別提遷司憲府監察出監真寶縣秩滿歸除翊衛司翊

衛因大臣議復前所罷科始調成均館典籍轉兵曹
佐郎并不就除忠清都事遷為洪陽縣監坐稅船晚
發編配廣州德峯驛因旱蒙宥連除侍講院司書司
憲府掌令司諫院獻納又兼知製教實錄卽廳或違
牌或呈病亦皆不就以子巨源官侍從推恩陞秩拜
掌隸院判決事又連除承旨禮工曹叅議大司諫或
再授或三授亦多呈病違牌盖公素志淡於名利脫
又自知與世寡諧遂歛而不出所居窮巷蓬蒿翳遲
時與近洞耆老扶杖相過棊樽錯陳頽然終日若與
世相忘若公殆所謂避世墻東而泯其迹者歟丁未

七月持授兵曹叅知病不能拜命以初九日告終于家春秋七十六時校理君自寧海謫所蒙放而歸公之就殯已四日矣父子竟不及面訣聞者悲之以其年九月己卯葬于金川梨谷帝釋山下艮坐之原公天性峻潔然介而能和貞不絕俗待人無畦畛色笑可親而亦未嘗詭隨家貧人不堪其憂而處之晏如平生無皺眉之色唯嗜書如芻豢棲山食淡與苦行頭陀同其刻礪者殆十年嘗言讀書以思索為主作文以瀉意為先自恨晚學失師用工則倍於他人云尤喜朱子綱目循環熟復至忘寢食以為非春秋義

例難以通解遂兼觀胡傳凡歷代治亂興亡與夫是非得失之迹瞭然如在目前舉以語人至不錯其幾卷與幾編訓誨後學至老不倦及門之士多有所成就或欲舉公實迹上聞于朝公輒峻責之及公沒而朝家始贈公吏曹叅判公夫人母李孺人無他子女唯夫人是依及夫人卒窮無所歸公奉之一如夫人在時終身不蓄姬妾人以為難治邑清簡不喜撓民深以俗吏干譽為耻雖如洪之地大務煩官門寂若無事遇儉歲必捐私廩以賑未嘗請錢貨料辦儒雅之治皆有去後思牧隱之後五傳而有諱清歷南床典

翰官止漢城左尹事載己卯名賢錄又再傳而有諱
安濟贈承政院左承旨是為公曾祖祖諱廷詰司憲
府監察贈承政院左承旨考諱袞有至行純孝早沒
妣全州李氏縣監槩之女夫人昌寧成氏士人後昌
女端莊雅潔善相君子先公三十年而沒葬祔公墓
凡舉一男一女女早卒男巨源前弘文館校理娶士
人鄭光緒女生三男三女男宇和運和世和女長適
進士韓光世次適申禧次幼校理君訪余楊寓以公
墓銘見屬而其辭甚戚噫公之志操行誼既足以矜
式衰世而其經術文學亦非俗儒所能及顧公善晦

不伐而余之文又不足以闡發幽潛則其何以稱校
理君之孝思而能有以不朽公哉第紀公官閥行治
系之銘曰

世醉功名如蟻慕羶公擠不有翔鵠在天世飫腐腥
嗜深機淺公味道腴枕蓀墳典世喜為黨互排競姍
公獨閉戶不纓其冠具是衆德歛而不出嗚呼若公
其誰之匹偶天畸人在公何嗟銘以昭之千載不磨

進士尹公墓誌銘

余既為尹雲仲銘其兄文仲矣雲仲又以其先大人
進士公墓銘為請紀昔己巳秋公與其弟季受及吾

內兄李寢卽學顏同登南岡而余亦從之飲酒騁望
相與娛樂余時年十七少公七歲公謂余見君抵某
人書殊有作者氣吾甚愛之余謝不敢當而藏之四
十三年矣今而以不腆之辭銘公父子斯豈公所嘗
期者而推公見與之意其或不以為溷也歟遂收涕
而許之謹按公諱志淳字和甫其先恭原人遠祖松
碑顯麗朝官銀青光祿大夫兼東北面都指揮使其
後有諱碩輔仕本朝官弘文館直提學燕山時有直
言配江陰以卒中廟屢加褒贈選廩吏寔為公八世
祖曾祖諱有吉平昌郡守贈戶曹叅判祖諱遇丁司

憲府掌令贈吏曹叅判考諱叙績戶曹正郎妣潘南朴氏經歷世基女公幼聰警為父母所鍾愛讀書音吐清亮不數遍輒暗誦不忘纔解綴句語已能驚人十七歲解司馬翌年遭內艱持喪踰制舊有病至是益羸悴見者危之已巳與仲氏正言公同擢司馬庚午六月十八日患脚腫竟不起得年二十五八月辛酉葬于延曙先塋至丁亥移窆于楊州加五里坐坤之原孺人昌寧曹氏祔焉公性高潔薦於孝友常以早失所恃為至恨遇諱辰躬洒掃視牲滌器克致如在之誠待人坦率不設表襮而見有過亦必面斥不

真瓜俗名也
當曰甜瓜

少饒其有沾於困厄者悉力周給初不計親疎有無
乃至解衣輟哺少無難色即文仲之疎財好義盖有
所自来矣文尤長於辭賦藻采燁然筆法亦妍妙已
已蘇解公卷在一等考官皆賞詞翰之兼美云孺人
禮曹叅判夏興君漢英之孫金溝縣令憲周之女善
事舅姑中饋女紅靡不得其宜當公沒絕飲食數月
既而悟曰吾而死誰當教養吾兒者吾其無以下報
亡人矣遂復飲食家雖貧隨方拮据俾子女免於飢
寒而其教之也則慈而能嚴公之病嘗屢索真瓜故
孺人每見真瓜輒為之噓唏終身不近口沒于丙子

九月十三日年三十二有二男一女男敬龜即所得
文仲早沒無後敬龍有三男一女男長鼎國餘幼女
適柳太垣進士有二男東雨東夏銘曰

天既生之俄又掇之彼昭昭者逝將安適惟茲四尺
之封即為幻軀所托女而士行亦耐于是後人哀憐
尚勿斯毀

外舅通德郎姜公墓誌銘

公諱晉相字候仲晉州人遠祖啓庸高麗國子博士
五世而有諱著三重大匡門下資成事謚恭穆生諱
淮伯始仕我朝為東北面都巡問使歸通亭生諱宗

德以學行進官司憲府掌令於公為八世祖曾祖諱
楫隱德不仕祖諱與載官侍講院輔德以文學著名
考諱碩昌由弘文館校理出為鍾城府使以卒妣平
山申氏府使恂女大司成敏一之孫公生八月庚小
環偶墮草樹間乳婢殊不覺月餘婢抱公至前所遊
處公忽叫欲下婢恠之置公於地公匍匐披草得環
舉以示之婢走告申淑人淑人及府使公皆大奇之
五歲知讀書日記數百言及壯聰悟絕人如書之禹
貢讀不過一遍即應口誦無疑其於史學尤該通凡
人名地名年號之隱晦者亦皆詳記無遺乃至本朝

故事亦多鍊達人家世系族派一閱終身不忘人多
以其得姓源委質於公而知之者少遊朴玄石之門
玄石深加愛重屢以補於人府使公沒於北塞公自
京奔笑盛夏潦水漲溢踰山驀谷二千餘里笑不絕
聲形色羸黑氣息綿綴行路為悲及返櫬諸弟皆病
公獨無事居憂執禮甚謹祈寒盛暑不脫裘絰蔬菜
之屬少有滋味輒不近口事申淑人愉愉翼翼未嘗
違其志與諸弟同居家無私財兒無常父接人以誠
不設表襮人皆愛慕而樂從之遊然鑑識過人懸斷
人休咎後多奇中沈尚吉髫年有才名仲氏欲壻之

公力沮曰兒目視多白長必不吉鄭麟重幼有能詩
聲次唐人長安古意一時傳誦公愛其才延之東床
及見大悔懊曰吾為一首詩所瞞或曰鄭生奇士何
言之過公曰此子外驚虛遠而內多慾將不得其死
後果皆伏重誅內兄申儉正端有獨子思詰常憂其
弱公曰外家諸侄惟此兒必有福祿公之藻識多此
類也其於程式之文皆不學而能尤工駢儷在場屋
屢遇宿構而必改製子弟欲以舊本書呈公終不許
竟亦蹭蹬終身斯命也歟少時同筆研之友多翺翔
臺省而公淡然守窮安貧既未嘗有艷慕之意亦不

肯屑屑過從唯書卷不去手或自抄寫積成屢秩以
是自娛而已易之不見知而無悶詩之不忤不求公
即有焉晚挈家歸隱楊江以戊戌十一月初二日告
終享年六十七翌年二月權厝于驪州圓寂山下先
塋側負丁之原配青松沈氏牧使櫟之女有一男五
女男壽國女長適郭鎮漢次絕食自死次適李德壽
文科叅判次適沈鎔進士持平次適韓應井早夭壽
國三男三女男長甫岳餘幼郭鎮漢一女適李仁和
李德壽一男三女男山培文科女適崔祉興沈鎔尹
得輿沈鎔三男麟之說之靖之德壽少娶公門公一

見即期許其所撫愛有踰於常今公沒十四年而余亦髮種種矣每過公大灘舊居輒不勝俯仰今昔之感壽國具狀屬銘唯其辭之不敢溢所以報公疇昔之知也悲夫銘曰

有蘊則多卷而不試其責有歸非我之耻惟楊一曲山明水綠藜莧是甘布褐猶燠彼得志者交鶩華轂乘運吐氣我聖我彥公樂內全奚外之羨雲徂水逝我涕其泫圓寂之原其下冥冥何以昭之外甥之銘

工曹判書兼知訓鍊院事李公墓誌銘

公諱基夏字夏卿韓山之李自稼亭牧隱父子始大

牧隱子種善始仕本朝官至判書謚良景良景生季
甸策兩勲官至領中樞府事韓城府院君謚文烈自
此冠冕赫焉凡八傳而有諱義培叅靖社功封韓川
君丙子虜難以公清兵使領兵勤王戰没于雙嶺贈
領議政謚忠壯生諱穆魁武舉解額未及覆試天啓
甲子西帥适叛隨內舅副元帥李公曙禦适松京師
潰為偵賊潛入京為适所得賊脅使降以鐵櫓櫓問
副元帥安在罵不屈遂死之事聞仁廟哀之特贈軍
器寺判官後以子貴贈戶曹判書韓原君生諱汝簇
歷御營訓練大將官至知中樞府事韓興君謚貞翼

娶延安李氏大司諫姪女繼娶慶州李氏學生公亮
女是為公考妣公幼沉靜不妄言笑貞翼公甚竒愛
之稍長讀書通大義大臣有知公者將啓于上俾就
武舉貞翼公聞之瞿然曰我子由文由武奚關國家
事而顧敢煩上請耶遂命公學射肅廟丙辰登武科
御營廳即辟為哨官旋除宣傳官兼備局郎廳對周
詳諸堂上皆喜得人陞都摠府都事刑曹佐郎陞正
郎兼賑恤郎廳自律甚嚴嘗捧糴吏以剩米告輒叱
退自衙還奴牽馬者懸草鞋鞍後公問知其所以得
嚴杖之己未拜遂安郡守勤於為治譯訓民歌以教

民凡所條設具有法度方伯善公所為遍諭列邑使
皆歛遂安郡人日投書衙垣更相告訐公榜示嚴戒
投者遂絕既歸民建思碑之秋拜內禁將陞折衝階
有失水靴者疑其同番請遍搜公曉之曰豈可以一
靴之故遍疑多人吾靴可代所失遂脫以與之庚申
除竹山府使翌年辭遞拜宣傳官癸亥遭貞翼公喪
守墓于仁川服闋復除宣傳官兼御營千總俄出為
甲山府使為本營啓留除慶尚右兵使課藝繕械事
靡不舉威行惠施軍民感悅丁卯四月公在營忽心
悸肉顫不能自定母夫人果以其日沒於京第奔歸

廬墓如居貞翼喪既除服訓練都監辟為右別將旋
拜春川府使前官信賊誣援多拘良民淫刑取服公
察其寃理出甚衆後有被援者公使混立官屬中命
賊認其不能認者輒自服誣引府自經亂逋穀甚多
官擁虛簿吏緣為奸而民以病告公以官用耗穀悉
代充大修倉舍計穀數以入取逋案燒於通衢於是
民歌舞之行操有將官死於陣率諸將為之臨哭棺
殮歸其家一軍感泣小違為御營別將因事罷禁衛
營又辟千搃叙除兼內乘出為濟州牧使州在海外
俗媮薄不識倫常之為重至詞訟黜陟亦必曲逞焉

囑公既揭榜嚴飭而又取金思齋警民編鄭松江訓
民歌陳古靈真西山諭俗諸書刊布島中使各坊各
廳分掌曉諭俾諷詠於閭巷隴畝之間州多高年為
設養老宴又遍饋以物及歸老幼扶携持魚酒爭送
多泣下者甲戌陞嘉善拜總戎使又除訓練院都正
兼捕盜大將都總府副總管襲封韓城君乙亥憲府
囚捕廳軍官擅收通符公以狀聞仍請申禁上詘憲
官特放軍官在囚者政院覆逆亦不從冬除三道統
制使當赴任上引見勉以盡心職事公既到營書盡
心二字揭壁遇飢賙恤以誠民卒免於流亡以其餘

力整飭軍械俾不朽鈍丙子拜御營大將兼備局提
調冬拜兵曹叅判直內司特宣法醢告病遄上遣御
醫診視仍賜內劑除漢城右尹陞左尹時飢癘殍屍
相枕藉城内外公啓請定監官收埋諫院乃謂全不
檢飭請罷公職叙拜副揔管出為平安兵使本營債
規利外殖利積逋累萬公悉啓滌之申飭列邑將校
子名隸旗牌者使自備戎裝戰馬團束待變及還朝
力陳汰定軍役為可惜又請燔魔埋置以備不虞安
州寧邊劃給附近邑官穀以充軍餉上并從之庚辰
除揔戎使捕盜大將移御營大將兼備局提調辛巳

除訓鍊大將又除刑曹叅判兼軍器寺提調仍大臣
建白繼疏陳韓川韓原兩祖死事狀并命褒贈旌閭
死囚曹永植在獄亂言及公公待命金吾上以狂妄
失性之言命鞫永植即伏誣罔拜兵曹叅判守知訓
鍊院事時有修築城池之議公言臣嘗遍觀八路形
勢無如都城者況軍器兵糧盡在其中棄以遺賊提
孤卒往保南漢孤堞甚非得計又曰所謂濶大難守
者為城濶軍少不能分排也都城六千堞堞立五人
三萬人足矣見今都民十一萬添以五軍門兵卒不
廣何以能容因兵判尹世紀公會侵辱連疏乞解職

上優批不許公猶力辭屢違台命上兩罷其職叙復前任兼帶悉如舊上閱武春塘臺公中兩矢馳射又中面賜豹皮及內厩馬諫院論公擔當城役耗財歛怨及其訃竊始唱約条之說請罷職不叙時廟議主等都城公謂新舊城不許繕等既載丁丑約条先咨後等實為萬全因是臺啓請罪主事大臣而并及公冬以受由久在外因臺啓罷職旬餘特叙還舊職丙戌超拜工曹判書以風病陳疏乞解遣醫賜藥物又連使掖隸視疾致內膳既少間始超召命上喜甚諭筵臣曰訓將病愈能出仕矣因入侍請復訓局陞

戶之規又請取濟州入山馬分給騎兵并許之兼都
揔府都揔管上以我國操兵專用戚法令諸大將相
議變通公䟽言陣法理奧知之實難率易變通誠不
容易目今操鍊多用方陣既有定形有似拘局聖教
所謂偏而無活法者以此然節目無多而易習變幻
甚簡而不難前層纔交後層間出既寓番休之意又
兼竒伏之理此非活法而何夫有全勝之將無全勝
之陣為今日計宜姑緩變陣之議先求才智之士諫
官因誤傳之言謂公輕侮朝廷請罷未久又特叙還
前職除知中樞府事校理黃龜河䟽論訓局事至以

軍儲蕩竭咎公公䟽辨甚悉上批曰予之任使卿久
矣決知卿非貪墨之人儒臣未諳訓局規模與兩營
有異疑之於不當疑之地指意非常予實駭然又特
下備忘牌招公屢違召命仍待命金吾諫院以偃蹇
請拿問既納供命削職俄特叙還授前職公時在仁
川廟堂啓言兵曹之啓促上來者雖用前例而命將
體重不當簡易若是宜用別諭上又以口傳付職為
未安特命開政皆古所未有也公天性慈仁恬靜和
而有守嚴而不猛雖以武進而其飭躬如儒生凡博
奕花石衆所好者一無經意商譯雜流屏迹門庭唯

喜觀書時或習字而已自朝議多歧鮮有免於標榜而公常言此系士論介冑之士又何與焉口無雌黃前後收議非軍旅則皆謝不知公會外絕無過從乃至所騎亦病閑然世亦以此頗相疑甚左右侵軼殆無虛歲而公處之夷然曾不介意乙未正言趙尚綱論公濫刑殺人持平趙榮福又以秘闕推奴劾公始請拿問繼請削奪上只許罷職叙除搃戎使公陳疏言宮家惡奴之怙勢恣橫者施之以常用之刑致殞於數旬之外猶謂急急撲殺他尚何說至於鎮營行關聽理始於前任元告亦臣所昧事係治盜詞證明

白何嘗彷彿於推奴上賜優批所以慰藉公者甚厚
上幸溫泉命公留都節制五軍門左右捕廳都民依
公以為安中使持標信或夜至開城門公馳啓請勿
論中使官官苟未及門限皆留止城外待曉始入自
此城門不夜開戊戌十一月公病猝殤上遣醫眡視
頒藥物又遣掖隸致酪粥公神識已昏猶口不絕感
激之言以二十四日告終于鄉校洞舊第享年七十
三訃聞兩宮震悼輟朝二日命優給喪葬需且致東
苑秘器遣禮官致吊祭如禮已亥正月權窆于楊州
治北遠源里艮坐之原公蒿於內行其侍貞翼公疾

貴已衣緋而手自燃燵以適其溫清語及母夫人輒
嗚咽久之事庶母盡其誠禮得一味之美必先進之
其在外官則朝夕饌品必親檢之仲氏府使公素羸
病與之同居時其寒燠視其飲食保之如嬰兒五十
年如一日庶妹年與女齊其備嫁衣於妹所無則於
女亦不備曰我女豈得過先君女撫恤貧族救其飢
而助其婚喪章服之外唯服綿素戒子女不得衣華
盛平居無疾言遽色浮誕鄙倍之言未嘗出於口事
或近巧絕不蕝於施措間是皆天性然也歷職內外
家人婦女無敢以差除獄訟干者所至必務節縮官

帑充物每倍原簿其自外邑歸尤嚴飭家率或至搜
檢曰毋累我行裝還家之日襆被蕭然貞翼公以廩
白聞於世而公克承克紹臧獲田宅無所增益嘗曰
為將者正已而攝下自然有威而可畏非啗啜刑殺
所能致其治盜未嘗輕加訊杖曰是刑也不死則為
殘疾可不慎歟先朝眷禮迫出尋常公恒言一則曰
國恩二則曰國恩而其遭人言則雖開釋敦迫必屢
疏固辭以為苟不識人間羞恥三軍之士必將以稟
令為羞乃至違召就理必違乃已其不肯苟於進退
又如此配貞夫人延安李氏青松府使文徵女謹於

思胤此
云思澈兩
一誤

享先嚴於治閭交關巫祝絕於門庭姻黨親族稱其
德美生後公一歲沒先公十三歲葬在仁川雲谷負
壬之原舉丈夫子輒不育取府使公子思胤為後進
士縣令二女鄭河瑞生負縣監金取魯文科判書側
出二男思慎武科思謹二女察訪金潤引儀呂必新
思澈娶金正尹志益女金取魯二女洪啓禧趙正達
思慎娶錦平尉朴弼成庶女生一女幼後娶進士尹
挹女生一男思謹娶叅議丁始潤庶女生一子一女
并幼金潤一子二女子東範女趙冕彬季幼呂必新
二子幼余少侍家庭數聞先君子稱公為賢而顧未

及識公及余策名登朝公已沒矣每有九原難作之
歎今縣令具狀屬銘謹取其大略序次而系以銘曰
允矣李公國之干城業雖弓馬操乃儒生恂恂雅飭
匪我求名資孝為忠約已勵清謳謠南溢威化西行
人曰信哉貞翼有子既秉戎麾仍陟元帥屢逆屢授
天眷靡替病有醫來辭輒褒繼嚙嚙多口在公何傷
良玉遭焚彌著其貞七旬齒尊八座官榮世方火馳
得者恒鮮坦步自致不資板聯混混末路乃始見公
維楊有山光氣騰虹告後式敬公藏其中

淑人林氏墓誌

淑人姓林氏羅州望族高麗大將軍庇之後父諱世
溫龍驤衛副護軍大父諱宗儒翊衛司副率以吏曹
判書贈領議政忠翼公墀之子出後於承政院右承
旨疎母完山李氏司憲府掌令贈左贊成迥之女淑
人生十九年嫁為戶曹正郎尹公扶之妻又四十年
而以乙未十一月二十九日沒于溫陽邑底始葬龍
仁泛開洞戊申改祔于同縣金坂鄉正郎公墓左凡
舉四男四女男恭教顯教彥教勉教恭教先天顯教
彥教俱舉進士亦早沒勉教今為義禁府都事女適
郡守宋堯佐判官任適士人李蓋及第曹命敬淑人

始嫁家雖饒而以護軍公之尚儉也資送衣衾不用
文錦而用綿布執笄之裝結麻繩為大帶舅家婦女
及婢妾皆指笑之淑人夷然畧無慚色姊姪凡八人
異門同室長短羣起淑人恒自撫恭不以舅姑之愛
加人又飭女使無敢妄有辭說於是門庭間其譽洽
然姑金夫人晚年雖多子女而恒安正即公家以正
即公及淑人善能承意致養也金夫人夏必困於午
睡淑人取諺冊展讀于前音韻清暢雖甚熱不命止
不止金夫人洒然忘其睡事死如事生三年饋食必
誠必慎曰他日入廟雖欲復為此其可得乎正即公

喜施予遠近親族多歸之淑人一意承順少無靳色
田庄所收酬人求句者半之接人仁恕雖婢僕有過
不色詬子女告以太寬則曰爾翁御下頗嚴吾苟不
爾非剛柔相濟之道也授兒小學書至古人言行特
絕處必反覆諷誦而曉之曰美哉吾兒亦能如此乎
其赴恩津也內兄李相國濡來送見愛女以綠綿為
長衣而無裳輒歎異之曰妹氏非今世之人使為丈
夫而居吾位必能儉俗裕國也淑人所以為婦為母
者既如此而其在家尤篤於愛親方八九歲時母夫
人當寒足冷不能寢淑人夜必抱足卧數問足得無

寒乎護軍公嘗得趙松雪書以淑人手藝過人要傳
模淑人承命下筆不失毫髮護軍公病殆時方隆
冬淑人每澡浴禱于家廟晨夕拜日月願以身代既
又刺指刲臂出血以進筮者言當以馬褱淑人曰吾
唯靡不用吾極遑問事之不經乃命洗護軍公所乘
馬置庭中親下堂祝天淚隨言下護軍公疾旋已馬
則病死聞者異之護軍公既沒李夫人高齡在遠鄉
淑人每思戀涕泣及正郎公宰溫淑人之弟象德為
便養自天曹郎出守湖南之珍山淑人喜甚即往省
無何而李夫人病歿淑人哀慕殊甚既還于溫每值

朔望輒為位服褻而笑及暮病漸篤遺教諸子女曰
吾所藏一櫛子及襦衣此吾先姑先妣所嘗襯身者
襦以覆吾首櫛則置諸身上又開示一篋曰此吾父
母手書吾平生未嘗須臾離各取幾幅納于棺餘以
殉之壙傍無違吾志其終始不忘孝有如此者嗚呼
若淑人其可銘也已銘曰

嗟惟淑人惟孝之至自幼及老由老至死一念慕親
斯須不弛推其在家舅姑是媚薦羞孔嘉兄弟咸喜
克相君子克順克敬訓子以義飭閭以正考德則多
壽奚不永銘以著嫺亦後之警

亡兒墓誌銘

壬子二月二十七日 上御進脩堂書講畢講官經
筵官交口言故假注書李山培文學超出流輩不幸
短命死未究厥用宜用近例贈職 上為之嗟惜良
久命贈弘文館副修撰知製教無經筵檢討官春秋
館記事官於是其父具其事告兒靈筵遂笑而為之
誌曰兒名山培字士寅方在胎母夢山底有於菟穴
處俄即奮迅而出其文炳如也遂名而字之幼娟秀
雙眸如曙星三歲能識字五歲就壁畫牛馬諸物象
皆甚肖見者奇之七歲先妣沈夫人授以書不過一

兩遍輒能通其義退而端坐讀之其聲琅然雖他兒
陳雜戲於側曾不一睨乙未父笑少弟哀傷特甚不
復以課學為心一切任其所為兒能自從人受業甫
及冠文藝驟進每下筆瞬息千百言矯健有氣其父
驚以為奇己亥兒年十七蒞解司馬己酉又蒞解每
赴津試輒居前列世皆擬以壯頭而竟連屈庚戌擢
文科庭試第二名兒既風神洒洒而識見文學又皆
過人由是聲名振一世先輩長德咸謂當作後來領
袖雖父母親舊之心亦然譽隆而忌盛亦其理也掌
令崔致重疏言山培父在考官列而山培多用其父

文冝覈處 上察其誣嚴教亟罪致重及分館朴致
隆等又尼槐院 上并罪致隆等然兒以此凡除堂
后史局卽皆不就唯於辛亥冬迫於嚴命嘗一入侍
上既屢回盼而諸承宣皆歎其周旋中節有若習熟
者其父憂其名之或浮於實也戒以閉門讀書勿復
投足世路兒亦絕意進取唯日夕探翫古書以自娛
而已如是而猶不蒙神佑斯命也歟兒始病用卜人
言移寓南村余日必再往見兒見余雖甚困頓必整
容起坐氣漸微而神不變眼彩比平日益炯炯至二
十六日昏後兒語其姊曰吾病漸篤意中自然作惡

欲更見父母面耳余聞心動亟走見兒自伸其掌意欲握余手而不敢請余識其意授以手兒便牢握不忍釋余曰若病豈有加乎兒曰疾已不可為矣其聲纔能屬余乃曉之曰若怖乎人生脩短已定於有生之初其能至於六七十難矣其下則或有稚孩死者有冠而死者有至三四十者其參差不齊天之命也若雖上方不足而下比有餘矣當安命順分置死生於度外使宵中坦然無所係強進藥物以盡調治之道誠使若終不幸者吾年衰髮白覺前去日月無多當埋吾骨於汝側庶父子相依地下耳兒始釋手

頻問其母之來遂與之訣如訣其父顧其妻曰毀焉
無或過也其姊取指血以羞謾謂梨膏兒飲而覺之
曰願姊無為無益之舉至翌日丑時氣遂盡余復就
見則已屬續歛手足矣余呼其小名曰望喜吾來汝
其知否寂然移時兒忽微舉手以示之嗚呼天胡忍
為是也兒踈眉清揚皙而秀髯手足軟潔如玉性慈
良清惠與物無競人未嘗見其有忿厲之容方其登
第也泮人走傳喜報兒徐曰吾果得中乎初無驚喜
色及其遭人言亦恬然不色曰在我無愧斯足矣終
其身未嘗怒詈其人雖其心之所欲為苟父母止之

則不復萌諸心雖微物苟父母所蓄不敢輒用雖其
心有所不平在父母側其色愈和晨昏定省不失其
時母素多病醫藥供奉必盡其誠力以其父不啖牛
肉亦終身不啖牛肉丁未先妣患痢漸篤凡藥糜之
屬兒必先嘗適其溫冷而進之左右扶護皆得其宜
他子女不能及也時先妣却藥不肯服而感兒誠孝
輒時強進先妣既沒兒手錄遺事甚詳每治朝夕奠
需從其姊出入庖厨為取樵燃火以助之嘗隨其父
東邑雄開門深居不預外事時或携書棲山蒲旬不
返邑人創見以為異事論人吉凶邪正徃徃多驗筆

法道勁能運腕作徑尺大字嘗作壽天說曰使百歲
老觀十歲殤固為一瞬間使八百歲彭祖觀百歲老
與百歲老觀十歲殤等耳十歲百歲八百歲推而至
於千齡萬齡都不過一夢夢之延與促又何足論其
言殆若自慰其生至戊申紀事詩則有云平生抱負
志食年纔三十嗚呼此其讖歟抑前知其有今日乎
若然者吾之所以期兒誤歟親舊誤歟一世誤歟奚
其發於言者不祥若是也雖然自古及今其賢如兒
或過兒而夭沒無稱者何限吾所悲者吾年六十矣
在家在官百事皆仗兒今既失兒孑然人世生誰扶

我死誰埋我只使人稱之為窮人以此終此生而已
豈不酷哉兒生於癸未八月歿於壬子二月其葬在
楊根西古同山下坐艮之原距判書公墓數武而近
兒之先全義人父吏曹叅判兼兩館大提學德壽祖
京畿觀察使兼兩都留守諱徵明曾祖黃海道觀察
使贈吏曹判書諱萬雄母貞夫人晉州姜氏通德郎
晉相女兒年十六娶東萊鄭氏高山縣監錫祚女生
一女三男皆幼其少者兒逝後五月始生銘曰

昔吾銘吾亡弟曰我死君埋理之宜君死我埋埋我
誰當是時有汝也而為其少也吾猶云爾今天奪吾

第又奪吾子吾不復置念於烏鳶之食而唯以餘生
之不速化為毒

司憲府監察李公墓誌銘

公諱九成字儀叔李為國姓定宗第十子德泉君厚
生即公八世祖也曾祖諱惟保贈領議政行同知中
樞府事祖諱景稷贈領議政行戶曹判書謚孝敏為
長陵朝名臣考諱長英尚州牧使妣延日鄭氏贈資
成淑之女公甫學語已能識字及壯出遊黌舍聲譽
藉甚癸卯中司馬庚戌除司饗院叅奉分差燔造之
任禁省浮費事克以集遷典壯署奉事又見差山陵

監造官莅事通敏叙勞陞六品除司饗院主簿遷司
憲府監察甲寅二月二十九日以疾告終壽望四十
其年十月葬于果川社堂里先塋側負乾之原公天
姿耿介有孝友至行常以父母心為心所愛亦愛所
敬亦敬有疾則色不滿衣帶不解煑藥煑粥亦必躬
親不以委婢使牧使公嘗疾舐公血指以進疾果良
已家雖貧甘旨未嘗闕父母苟不悅而見責負罪引
慝若無所容雖伯氏正郎公或有過情之詬亦必和
顏好語回怒為笑弟妹患癘皆躬自救護叔父判書
公正英嘗按關西公從之留營中深居書室日以讀

書為事不曾窺門外一步地箕城人乃不知按使衙
中有子弟病世之外剛內荏者其處已接物未嘗不
在於寬和而臨事見義毅然有不可奪之操睦於親
戚與諸兄弟羣從兄弟接屋連基朝夕相從和氣融
融至於鄉居窮族尤隨事周恤曲致其誠意遠近宗
黨如歸其家筆法精妙世稱王氏家子敬雖在急遽
之際未嘗胡草亂書常吊知舊主家屬公寫銘旌吳
竹南竣以一代書家鉅公從傍睇視公畧不動色排
寫安閒吳公既美其筆法又服其操履焉配令人金
氏系出光州同知中樞府事慎厚女婦道甚備後公

三十五年以戊子三月十三日沒享年七十四葬祔
公墓凡舉一男四女男聞政以待從父加階通政女
長梁徵通德郎次金宗衍牧使次金壽徵次朴昌徵
武科營將聞政八男一女男匡國早夭匡世文科大
司諫匡績匡岳匡直匡維匡業匡宗女申鎮屋梁徵
二男一女男益柱益標武科女閔思孟進士金宗衍
二男一女男得大進士郡守錫大女鄭錫遠金壽徵
三男一女男燁煜燁女鄭揆朴昌徵二男二女男聖
揆聖基女李

次洪應寅進士匡世男性孝繼擢

大科方出入臺省夫以公才行之美宜若大有所展

施而卒之位庫而又無年此固親黨交遊所共惜者也然後出髡髡頭角多嶄然使天道而果有知也其不食之報殆將於是乎在矣大諫慈夫人余之再從婦也以公墓文見托義不可終辭遂按狀序次而系之銘曰

聖論為政首稱孝友家道見光奚弼奚輔世惟不幸匪公之咎惟其少試乃在蔭路公有不食子孫多有若若其授于臺于府神報公祉俾裕厥後婉婉令人配德無疚媚于公姑載薦漿酒既暨而居跡不踰戶始終率禮三紀而祔斯惟吉宅永安且固

處士鄭公墓誌銘

德壽幼從先君子拜處士鄭公於南山下公與弟麟
蹄公聯坐談笑其風致散朗無一點塵俗氣德壽雖
駭猶能心識之時公庭中有馴鶴德壽意欲得之公
笑曰孺子亦知愛此乎舉而畀之無難色德壽藏之
心迄不敢忘也未幾而公遂沒而寒暑已四十七易
矣夫以德壽之稍能知拜跪而其所追記當時事者
推此而已則况鎮川君雖子於公重免乳耳又豈能
所有省哉其不能舉公之全亦其勢宜爾於是鎮川
君怵然以懼以所嘗承聞於太碩人者次為狀而屬

銘於德壽德壽其又忍斬諸公溫陽人諱純陽字子
賓其先有晉天仕麗中葉官至戶部尚書其後得良
始仕本朝官判繕工監事四傳而為左議政順朋寔
生縣監礪學通三教世稱為北窓先生生諱之復無
嗣取堂弟叢桂處士之升子時為後又無嗣以伯兄
佐即晦之子麟卿為後蓋再斬而再續矣仁祖朝擢
文科官止右副承旨娶海州崔氏持平弘載女是為
公之考妣公天姿峻潔如秋霜皎日視人之伊優脂
韋者如或浼焉平生未嘗向人有所求丐麟蹄公在
邑欲分俸濟公要公送人公曰此吾性所不能豈以

汝之於吾而謂異於人之於吾輒變吾所守哉竟不
從其堅介類此李華谷慶億兄弟及朴久堂長遠皆
公族親適居銓席或欲以公為言知公必不肯俯就
卒莫之生意也公好讀書手未嘗釋卷其於史記綱
目尤融浹貫徹仲父東溟公文章高一世而見公作
未嘗不嘖嘖也麟蹄公亦博學能文然年近五十猶
隨公入塲屋供筆研之後不敢自就曰吾兄赴舉吾
何敢後兄而先已其家行之薦又如此丙寅夏感微
疾不起享年五十三窆于高陽泉青里西坐之原初
娶延安李氏領議政延陽府院君時白之孫郡守悅

之女不育繼娶清州韓氏縣監挺箕女有一男三女
男壽淵進士鎮川縣監女郡守尹志益直長洪遠度
士人李昌彥壽淵三男一女男光殷文科持平光周
光漢女適金載尚尹志益四子二女男敬夏敬殷敬
周文科承文正字敬明女適郡守李思胤士人權攝
洪遠度一男一女男望人女適尹熙慶李昌彥繼子
兩祥一女適呂善徵公之著述散逸無存者顧嘗聞
金三淵昌翕恒誦公一聯曰澗底生新草巖邊落晚
花以為逼唐而及其挽公則云夾世文章骨傳家道
氣叢蓋紀實語也方公沒時鎮川君年纔六歲東溟

公諱斗卿麟蹄公諱正陽銘曰

公在風塵矯如海鶴所以愛畜惟友其德童子欲焉
公舉以畀在我在人脫然無累皜皜之潔困于泥塗
九臯之唳莫徹天衢鷄鶩紛紛啄腐競穢翩然遐逝
俯視濁世童子老矣乃述乃撰邇懷雲霄有涕其隕

恭人韓氏墓誌銘

恭人清州韓氏太師蘭之後縣令挺箕之子翊資尹
公元之之外孫處士鄭公純陽之妻鎮川縣監壽淵
之母始恭人早失母育於外王母吳夫人寔晚翠億
齡之孫老多病其起居飲食非恭人不能安每歎曰

吾見世之婦女多矣既通且哲未見有如吾孫者內
舅僉正坪亦甚重之遇事多咨而後行及歸鄭氏姑
崔夫人性嚴諸子女鮮有當意者惟恭人終始無絲
髮致責辛亥崔夫人沒歲仍大飢疫斗米百錢恭人
能左右拮据朝晡饋奠不失其時與妯娌居怡怡咸
得其歡心勤於女工閨內之政井然有序及虜士公
下世鎮川君年甫六歲而兩女又未笄宗祀凜凜如
一綫欲絕恭人晝夜抱稚孩笑於筵几淚涸而見血
目為之盡腫人皆謂必無全理恭人忽翻然改喾強
自支持卒能成立門戶嫁娶以時恭人於是乎為過

於人矣鎮川君弱不任遠出而恭人能割愛俾從師
於外每以小學中寡婦之子為戒筭室處士公墓下
時節往留以遺孤藐然世故難測欲堅墓石衆難以
財力之鉅恭人夙宵營度竟如其志御婢僕嚴而恩
乃至居南方千里外者皆能革其悍頑之習奔走寧
令充薦於奉先觴豆腍膾必豐必潔非大病晨昏必
循審祠門內外至老不廢凡恭人所以為女為婦為
母者如此嗚呼豈不賢哉嘗痛本宗無嗣廣求諸族
俾尸其後及析產一無所取盡推與之縣令公三娶
李淑人其年在恭人子女行娶而窮恭人邀致于家

盡其供養宗黨有窘匱傾儲施與不為日後計聰明
強記談古今事亹亹可聽到老治家事無倦升斗出
入一不遺錯此又恭人行實之可書者也辛亥八月
恭人在鎮川官舍患痢日增劇每靜卧必屈指至十
四而止問之亦不荅竟以其十四日不起壽八十九
權厝于高陽泉青里子坐之崗將以明年癸丑合祔
于處士公墓鎮川有三子一女男光殷文科持平次
光周光漢女適金載尚三女壻郡守尹志益直長洪
遠度士人李昌彥其出子女并見處士公誌恭人之
於鄭氏所謂功存亡而德繼絕豈獨閨範之為高世

而已哉在法是宜銘銘曰

婉孌之施鬚眉之惡有編閨烈敢告首錄更生逝矣
我筆嗟禿

貞敬夫人田氏墓誌銘

原任兵曹判書李公森策戊申奮武功封咸恩君追
爵其考諱師吉議政府左資成咸平君而母田氏從
封貞敬夫人後五年壬子夫人年八十以閏五月二
十九日病卒將以八月合祔于尼山酒谷乾向原資
成公墓左先期屬銘於德壽謹按夫人南陽入國初
有直提學柱生漢城判尹得雨謚敬胡敬胡生判中

樞府事興是生副提學稼寔夫人九世祖祖諱澁官
縣監考諱一成通德郎妣坡平尹氏府使聖舉之女
夫人性慈惠承祀主饋動不違則凡於衣服飲食不
喜華靡每舉少時艱窮以詔家衆俾知戒懼窮濟
困瘼於至誠乃至箱篋無遺藏待族親撫婢御咸有
恩遠近歸仁焉其教判書公恒以居官廉白眷眷為
言而尤於事君大節凜然嚴截當戊申之變判書公
以訓鍊大將屢朔扈衛宮城夫人在家病薦上俾判
書公間日歸省夫人即送言判書公曰此何等時而
敢恤私情設汝來吾不汝見矣勿以吾為念專心戎

事吾之望汝止此而已判書公陳疏以聞上諭以嘉
卿母訓子有方前後遭國哀必具祭服孿子婦登家
後園望笑行服及其疾久而判書公不離側又嘔唏
曰以吾之病致汝久未造朝無乃或缺於義分汝宜
趣今入覲無專念我為也判書公為世所齟齬屢陷
危機賴上深知其忠終始保全及夫人沒上又教曰
咸恩累經事故色養無多今遭巨創予甚傷惻其令
該曹從厚顧助嗚呼此可以見君臣矣苟求所以致
此則又豈非夫人之教然也唯其脩之身者有以行
乎子行乎子者有以孚于上卒能受隆褒於生前而

致異數於身後嗚呼其可尚也已其可尚也已夫人
有一子一女女適尹憲早寡無嗣子即判書公有一
男希逸進士尚衣直長銘曰

溺情蔽愛婦也皆是嗟惟夫人獨裁以義天廩有赫
薦嘉訓子命官歸贈亦數之異既壽既尊神報厚祉
納銘幽墟戒其傷毀

贈貞敬夫人全州李墓誌銘

夫人姓李氏太宗大王第二子補封孝寧大君浴而
下之至夫人為九世父曰漢城府判官贈吏曹判書
尚淵大父曰慶尚道節度使灤母曰原州金氏學生

崇文女領議政金公塏之外孫也夫人早孤為仲兄
僉正維漢所育嫁為禮曹判書贈左贊成徐公文裕
繼配戊子八月十四日卒壽五十三從葬贊成公墓
左夫人性至孝判書公之喪年未及笄然能躬治下
室之饋朝夕笑泣必盡哀見者感動其制行甚嚴諸
兄弟皆自以為不可及輒嘆曰使吾妹而丈夫也詎
不為第一名流惜其局於簪珥宜吾門之衰也贊成
公少孤貧夫人手紡績勤苦立門戶嘗有鬻漢書者
贊成公意欲取之顧無以辨其價夫人輒斥所御衣
服以買之贊成公既貴戲夫人曰近日祿俸亦足以

償夫人之宿債矣。贊成公兄弟男女凡十一人。夫人處其間。無不得其宜。乃無絲髮間言。前夫人有一女。尚幼。其慈覆一視已出。歲時外邑饋遺。必分諸貧族。事兄僉正公如父。候問之使日踵其門。得一味之異。必以饋焉。贊成公或有過。克諍克規。或因門隙之窺。臧否人物。後多有徵一宰相。貪婪喜權。贊成公因其屢過而造謝。夫人謂諸子曰。此人非士類。而若翁屈已見之。何其不自重也。誨諸子必舉人之善。不善俾為法。為戒。其教女尤有法。大而容止辭氣。細如組紉織紵。靡有所遺。以故諸女皆為舅家所稱。及南氏婦。

夫所天執禮滅性而朝家施以旌閭之典則人皆曰
非獨是婦之賢乃夫人之教使然也使婢僕恩威交
施自宮達外庭無急步高聲而家間事務巨細畢舉
及夫人之喪老少笑之如笑其父母焉賁成公既寢
疾夫人不解衣者累月當極寒夜必沐浴禱天願以
身代賁成公既沒每泣謂子女曰吾年踰半百豈惜
餘生不下從逝者乎過葬久猶不改水飲諸子女涕
泣交諫皆不聽對人言皆身後事及沒賁成公之服
蓋猶未練也悲夫夫人長子宗玉今官大司成次子
宗璧今官縣監二君之言曰謝景山之母得歐陽子

之文而顯於後世若吾母之行求之內則底無所愧
唯其為子不孝得罪鄉黨不能如吾妹之表章若又
不得執事文是終於掩蔽而不顯嗚呼若夫人之烈
又豈待文而重哉早晚必有為之言者其為太史所
記與古之喆母貞婦垂耀今與後可拱而俟也今茲
之述姑以塞二君之意云銘曰

夫人之沒晦窩李尚書寅燁以詩吊之曰晚山徐尚
書於我為從昆況此南山下同居一里門對坐或看
棊併卧或論文尚書有賢婦吐嗟辦壺樽肅肅重簾
靜不聞閭內言淑德與婉儀實為宗黨專門闡何輝

赫兒女羅眼前長男既娶婦少男髮披肩長女已抱
兒少女尤娟娟觀者相歎嗟曰唯夫人賢尚書前年
冬一疾竟未痊夫人獨煢煢自稱未亡人願與尚書
死相從於九原愛子與嬌女決絕慈母恩朝夕淚如
泉暮已成血痕至痛煎中腸沉沉病嬰身嗚呼臨絕
語聽者亦酸辛婦德節為先斯義今無存夫人能辦
此貞烈動鬼神左氏稱杞婦歐公歎李媛今我觀夫
人二女可同倫焉得兩公筆述此照千秋嗚呼其盡
之矣吾取以銘夫人焉

長城府使李公墓誌銘

公諱臣龍字夢得李籍全義自高麗太師棹始我穆陵朝有諱濟臣官北兵使贈領議政世稱為清江先生生諱耆俊承文副正字贈左贊成是為公高祖曾祖諱厚基掌樂院正贈吏曹叅判祖諱行進吏曹叅判弼止庵考諱萬相通德郎妣竹山朴氏通德郎榮先女公之始生止庵公夢有龍徵遂名而字之既免乳不離止庵膝下及止庵公沒公年十歲哀慕如成人癸酉中司馬翌年除厚陵叅奉以親老自免去復除童蒙教官移義禁府都事陞掌樂院主簿遷戶曹佐郎出為衿川縣監居官廉謹吏民懷之辛巳除宣

惠卽無董山陵補土之後復入地部為正卽捧穀時
斛外溢墜者謂之剩米多少率私用公盡散親故貧
乏者有餘施及吏胥逆產之籍入及倭貨斥賣者諸
僚輸廉價爭取李相公世白甚駭其為拘儻人按查
唯公獨無所累李公歎曰吾固知李負外必如此不
如此惡足稱李負外除朔寧郡守地部啓留不遣俄
又除富平丙戌丁內憂邑民歛錢致賻公謝不受民
多泣送又樹碑以追思服闋除司僕寺主簿數月又
遭外艱辛卯復為地部卽遷尚衣院僉正出為長城
府使值歲飢殫心賑救民以全活舊例官用皆責書

負少與其直而厚徵其物公歎曰官刻吏更刻民是教人以偷也乃以穀千餘斛錢數百緡別為庫貯之存其本而取其剝俾官用凡百悉於是乎取民大稱便而後為政者亦不能改也及歸行橐蕭然乃無一南物丁酉復除朔寧郡守翌年移拜羅州牧使臺官有嘆公者以老不堪劇論公公笑謂子弟吾老矣吏役非所樂從今當永謝世緣無以口腹累乃公為也是歲又除綾州牧使親舊交口迭勸竟辭不赴戊戌十月十日終于京第壽六十三公為人峻潔堅介不以貧窮變其所守與人交輸蒞無所隱間以諧笑英

華湓發平生以廉白自勵不唯在官為然公之婦孺
嘗析產以歸公公貽書却之曰昔吾先祖清江公常
戒子孫為吾子孫視財物當如糞土吾豈受此以孤
吾先祖訓戒乎歷職內外而家徒四壁及沒篋無遺
衣六日始就歛公之族弟僉正徵成嘗語柳淮陽鳳
逸今世士大夫居官潔已為吾儕所當法獨有長城
族兄柳曰君則能乎我則不能然公雖喜談人美而
亦不能容人之過時或肆口奮罵其所取怨多在於
此奉病親盡其孝養事季父如父一弟早亡館婆嫂
畜孤姪恩義備至其內行之篤又如此淑人綬城具

氏通德卽錡之女柔嘉淑慎甚得婦道後公十五年
壬子四月二十五日沒始葬公楊州文翰山止庵公
墓側及淑人喪改卜廣州胎藏里艮坐之原移公墓
合窆焉有一男三女男德老娶叅判朴鳳齡女生一
男春培繼娶幼學安相萬女女適柳天齡金錫紀閔
正漸進士春培娶教官黃旻女先君子與公同祖資
成公在諸冢中尤賢公而德壽自在稚穉又為公撫
愛今追思如昨日事德老以公墓文見托搢毫而不
自知涕之流落也既序而銘銘曰

古稱士大夫苟能清白便是七分人其所以尚靳三

分者抑由他行之未純若公政術著乎內外孝友充
於家庭雖加許以九分又孰譏其過情

同知中樞府事李公墓誌銘

李之籍韓山者皆祖高麗戶長允卿歷數世曰穀曰
穡曰種善曰季甸連四世為世聞人源深流長簪組
汔今不絕至我長陵朝有諱義培策靖社勲封韓川
君丙子之亂戰沒于雙嶺贈領議政謚忠壯子諱穆
魁武解未覆試值适變見拘於賊不屈而死始贈軍
器判官後又贈戶曹判書韓原君兩世並旌閭子諱
汝蕡知中樞府事封韓興君謚貞翼遍管三軍門大

為孝顯兩朝所倚仗初娶延安李氏大司諫衿女繼
娶慶州李氏學生公亮女公繼夫人出也諱基漢字
漢卿幼負氣不羣既就學勤苦過人屢發解輒屈會
闈戊寅蔭補貞陵叅奉歷廣興倉副奉事尚瑞院副
直長掌樂院義盈庫主簿掌隸院司評通禮院引儀
平市署令出為楊根縣監加平郡守富平府使莅加
最久餘皆不久居也已亥陞秩為僉知中樞府事丁
未又陞秩為同知中樞府事是年六月二十三日告
終于第享年八十葬于仁川新峴午坐之原公氣貌
軒渠進止有威儀內行甚篤事親恭謹無毫髮子第

過侍疾衣不解帶執喪三年不脫褻晚患脚痿不良
於行而謁廟與祭唯謹及其病瀕危猶欲叅月望子
弟交諫皆不聽命侍者負而至廟力疾行禮而退寔
臯復前八日也其至性見於疏節者如此早嬰重病
謝公車唯杜門深居無意需世雖晚從門蔭而非其
好也與伯氏判書公不異宮不異財判書公保公如
嬰兒而公仰判書公如慈母日清坐相對其樂愉愉
姊妹女婦不冠紳不見弟姪有病憂形於色見其良
已乃已推之遠近宗族亦然念其飢寒而思所以周
濟者無所不至居官自律甚嚴太倉官例用剡穀而

公不以升斗自私及適盡委諸庫中曰用填其欠縮
也在加平五年舉用是道前後既多補民租而又設
補民庫俾祛調發民馬之弊及歸留簿猶充牣吏民
以為自丙子亂後所未有而代公至者亦為之驚道
臣狀廢其異績而邑氓亦追思碑之居富乎數朔移
疾歸歎曰蔭仕至府使亦足矣遂絕意從官偃仰一
室室中唯藥床書架庭植花竹彈琴數曲以自娛而
已間亦好觀古人墨跡其隸草各體筆法奇勁非甚
病必正衣冠不設惰容接人甚恭雖少者賤者必以
貌尤慎樞機不妄臧否人物亦以是戒子弟遇事謙

退不屑為崔異之行然至其自守斬然有不可犯者
以故判書公握兵權三十年而公之庭乃無一雜流
黃緣之逕觀於此亦足槩公之所存矣配貞夫人全
義李氏司藝雲根女志操貞順婉德無違家庭之間
人無間言先公十二年以乙未七月二十九日沒享
年六十九葬祔公墓舉一男思胤郡守為伯氏判書
公後取從高祖弟府使基聖第二子思觀為子登庚
戌進士女適俞勉基判官側出一女幼思胤娶僉正
尹志益女思觀娶士人邊致殷女生一子一女并幼
俞勉基二子彥集彥博判書公諱基夏謚貞僖銘曰

謂公蔭吏奚其異於世之蔭吏吾觀世之蔭吏多引
賦以自污公則一塵不累吾觀世之蔭吏厚於要人
而薄於骨肉公則跡謝權門而內行醇備入公之室
橫膝一張枯桐神架千軸書史但覺清氣之襲座使
人利祿之心都死公與世之蔭吏其不類如是然則
謂公蔭吏者即其外之迹乃其中則可謂曰清脩篤
行之士

龍驤衛副護軍林君墓誌銘

余既銘林君大潤矣大潤之兄昌湜又以其先君墓
文見托曰斯吾亡弟意也亡弟嘗欲得當世鉅筆以

闡揚先德不幸齎志而沒今其責在我敢繼以請余
既賢大潤而銘之矣銘其子不銘其父烏可哉遂序
而銘君諱英雋字際遇谷城人世居松都祖諱六楠
以壽聞秩嘉義考諱有善嘉善妣貞夫人裴氏學生
大鳳女君少聰慧讀書不數遍輒暗誦不忘及長有
膽畧好觀兵書丙辰擢武科丙寅陞折衝行龍驍衛
副護軍戊戌九月二十八日卒于家享年六十五君
沒之十五日淑夫人金氏繼沒始葬德北進鳳山已
亥移葬長湍華藏山大圓谷負坤向亥之原君善事
父母及丁憂守制甚嚴睦於諸族憂其憂而恤其窮

家雖貧不以有無經心惟以孝友文學勉子姪見人有違行悖德必以禽獸呼之且以戒子侄曰彼所以為禽獸者以其不學若曹可以知戒矣論事是非確然不肯隨俗上下語及古今忠節必擊節扼腕若可以早暮遇者與子昌澤父子間自為知己每語昌澤若能篤志文學雖不第不恨也又曰兵家書益人智慮雖文士不可不觀昌澤嘗從容進言以大人才略何不求自試君慨然曰當今之世無賞不得進吾見亦多矣且趨走諂附非吾性也平居惟日飲無何終不肯干謁當路世亦無為之推挽者故卒不見用而

其所見於居家者止於如此然嘗聞君當管理設營之初凡營陣操鍊之節無能曉其制者帥臣以屬君君馳詣京營一閱其制既還叅稽損益一時立辦帥臣才君之為擢為訓長君請以兵家要旨月講而賞罰之為人所陰沮事遂已又嘗以策干府帥不甚見奇而罷蓋君所抱負者不毫髮見試卒落拓以死斯豈非命也歟夫人學生國建女惟端潔婦道甚修姑裴夫人有疾夫人洗濯衾褥在衆婦中獨無難色裴夫人臨沒曰必使某婦沐浴我王舅老無齒治饌品必務細軟王舅每稱其善養沒于戊戌十月十三日

壽六十三有二男四女男昌湜司果昌澤進士贈持
平女出身李後泌通德郎尹禹錫禹逸萬林震垓其
婿也銘曰

介胄其躬韋布其操宗族吾恤父母吾孝善吾斯慕
不義吾唾權門潭潭輦金暮夜衆趨羣湊尻高首下
性吾不能吾飲吾酒澆吾磊塊春生浩浩吾竒不售
匪吾之咎有書在案千古尚友大圓之谷女士是祔
銘于其隧尚永不朽

郡夫人崔氏墓誌銘

余嘗為李季和作郡夫人崔氏七十壽叙矣後十一

年壬子二月五日夫人以八十一終季和既祔葬於
楊州天磨山其先考林原君墓左而以識墓之銘見
屬蓋以余知夫人之德有素也嗚呼若夫人之德固
宜銘銘其敢辭夫人幼沉靜不妄言笑十九而嫁不
及事舅姑猶及事王姑洪夫人晨夕侍側無惰容命
之事奉行唯謹凡所以忠養之節靡不曲致其誠二
十年如一日林原君有一妹為金氏婦夫人視之均
同氣及其沒於蓐則収其遺孩而鞠諸家其撫憐也
又均諸子閭內之政秩然有法嘗曰中饋之職謹
鑰明簿書要於無漏則可耳規規於轉貨殖利以為

能者怨之所府也儉於飭身凡諸費用必務撙節而
至外有賓客則酒食之供唯恐不及尤謹於享先滌
器視牲往往徹夜籩豆之實既豐既潔訓子唯勉其懋
學為善士不以科第為榮季和能廢公車業薦志文
籍繫夫人教是賴每朝致婢僕於前各屬以事而夕
受其成軫其飢寒而厚其衣食有罪隨輕重施罰以
是下樂為用而家道以成自少至老刀尺不去手暑
不袒跣勞不跛倚疾言遽色未嘗見於外夫人之德
如是可不謂備乎崔籍江陵英陵朝有諱致雲寔
為名臣官吏曹叅判五世而有諱基鏘侑儻有氣節

除官不就生諱文湜文科禮曹叅判是為夫人之大
父父母貞夫人朴氏禮曹正郎激之女夫人有三男
二女男長廷燁工曹正郎次廷煥通德郎次廷燮翊
衛司副率即李和也女長適吏曹判書金東弼次適
金聖集林原君別有誌狀銘曰

媚茲王姑蒸蒸致孝遵豆靜嘉亦在其廟視外有客
飭我中厨肉登于盤酒盈其壺誠兒就學榮吾匪志
蚩蚩在庭遵法敏事嗚呼夫人唯德之備我銘匪溢
來者其視

忠清道觀察使徐公墓誌銘

年惟乙卯其月閏四其日初七徐公止叔以左承旨
入侍便殿暴疾舁歸以其夕告逝德壽連三日赴哭
既歸悲愈甚忽忽無生世趣非哀止叔也乃所以自
哀其生也夫人有不免襁褓而死者亦有終其身窮
且賤今止叔年六十三不為夭矣官方伯連舉不為
卑矣死者天地之常理奚可甚哀獨余畸孤之極凡
親愛之粗能問其飢寒差異乎塗之人者無不長第
先死在世孑孑如贅如寄其所賴而為晚景依惟一
止叔而今又失焉則烏得不自哀其生也哉公之諸
孤奉公體魄將歸葬於楊州某村某坐之原而先期

以識墓之文見屬後死之責其又可辭遂投涕而書
之曰公諱命淵止叔其字也徐氏自麗汜本朝冠冕
相望至穆陵朝有諱消官判中樞府事贈領議政生
諱景霄尚貞慎翁主封達城尉是為公高祖曾祖諱
貞履南原府使贈左贊成祖諱文夏贈吏曹叅判考
諱宗憲江原道觀察使妣光州金氏公自少端方堅
貞事親有至行當己巳歲世道大壞公作冬雷賦以
見志遂絕意舉業沉潛性理諸書日有新得甲戌後
以親命應舉魁丁亥柑製仍擢殿試第三甲例受宗
廟直長陞掌樂院主簿禮曹佐郎兵曹佐郎正郎司

諫院正言司憲府持平侍講院文學掌隸院判決事
承政院同副承旨刑曹叅議兵曹叅知叅議戶曹禮
曹叅議常帶知製教內所歷也京畿都事朔寧郡守
潭陽東萊驪州淮陽中和襄陽伊川府使皆其所莅
又拜忠清道觀察使外所歷也嘗為谷山忠州未赴
而適又嘗首擬諫長而靳黈凡公所至必有惠愛及
民民多豎碑頌德而伊川民至營生祠而尸祝云始
公之受命赴湖西也當戊申逆變之初賊既殺兵使
遂據清州勢張甚而公手下無兵列邑又皆空公不
得已由牙山直走洪陽行收兵得萬餘人鼓行而西

軍容甚肅將賻賊於西原巡撫使吳公命恒檄公俾
以兵授兵使事定議者咎公不由大路赴任搆以避
賊廷尉問竄之鐵山吳公命恒李相光佐趙公文命
相繼白公忠亮宜賞而不宜罪始見宥後因公陳疏
引罪上諭以其時事勢誠有然者任用如舊公清介
絕俗屢典雄邑而其貪如洗身沒之後待賄賻始克
成歛性不喜詡詡馳逐公退必閉戶看書凡世所榮
慕淡然無足以嬰其心見人有不義不廩惡之若負
塗之豕晚喜讀易以為有至樂嘗與余同棲鵝湖講
論精義數旬而罷嗚呼今其可復得哉公凡三娶有

二男四女男敏脩進士尹氏出也女李徵著洪應觀
沈氏出也男用脩女李健燮幼未行朴氏出也側室
有二男二女皆幼敏脩有二男一女男有常有綱女
幼用脩有女幼公沒十餘日上臨筵思公曰其人薦
厚由予知之不早不究厥用筵臣宋寅明仍陳公持
身簡靜居官清白且不喜黨論之實跡上嗟悼久之
曰予猶未知其若此聞其有子不待終制宜即調用
又命入侍地部官給祭需天眷之及於身後者如此
廷臣莫不感動而益悲公不能得之於生前也余既
叙公質而不華復系之辭曰

賢孰止叔之如而翦疇先占高位清孰止叔之如而
貪墨輒肆其志忠孰止叔之如而噓媚者構成厥罪
是固當路之責而亦由世運之日壞乃吾之慟不為
公而為私郢質亡而牙琴絕昔人所為深悲胡化翁
之祝余惟餘日之泣滂子於吾文常加賞愛今以識
子之壙尚子心之有契

贈吏曹叅議權公墓誌銘

近世有權公諱益文君子人也始官義禁府都事移
氷庫別檢又移繕工監監役其官止於此其道不少
行於世固無得以叙叙其操行居家之懿以詔于今

與後云公天姿近道方五歲得三綱行實略受其旨
喜對人稱說稍長遂慕聖賢之學終日端坐一室惰
慢不設於容教戲不發於口惟取性理諸書潛心玩
索既又掇取要語手書作屏障而揀其尤切於服行
者作小帖置衣袖中出入必目至於燈爐之屬亦皆
有銘以自警其薦志嗜學如此嘗從朴玄石論學玄
石語人曰權某見解精透他日成就不可量也尹明
齋得公恨相見之晚告其弟推曰吾見今世問學之
士多矣未有如此人之薦實事父母至孝晨起必盥
櫛而問候非甚疾不敢懈事為之間或有少差和顏

以諫入而後已其有疾晝夜不解衣帶親視湯膳復
常始敢退家素貧大夫人或親鄙事公必以身替勞
至冒風雪拾柴於園林丁亥闔家遭癘公雖在危暇
中輒舁至大夫人所親搽藥以羞命之退終不退既
遭喪號擗墮絕人不忍視吊奠之暇遍閱禮書務求
合宜禮父在母喪暮後廢上食公據鄭寒岡所引關
閩諸說以為雖非古禮非如服喪有二尊之嫌叅酌
經權盡人子之情仍行不廢但止哭泣著說以見已
意事諸叔父母視父母仲母臨沒以三孤托公公愛
均同氣教導有方常曰吾王考俾吾諸父列屋而居

吾儕奚不逮吾王考之意古人九世同居是效是勉
是吾之望是以宗黨慕而愛之有大事必就定朴定
齋恭輔諫死公素不相識搢文往哭世尚其風節壬
辰秋感疾轉劇公自知不起却藥不肯服求與僉樞
公訣僉樞公入見公垂涕曰生不能盡奉養今又貽
斯戚兒罪大矣然死生常理願勿疚懷又謂子第曰
吾母之葬宜遷而未遷吾目將不瞑矣今以是屬汝
輩又顧趙孺人曰奉老享先繫子是托最後命侍者
取監印封而署之俾傳與勿踈左右泣公揮之曰生
寄死歸烏用怛為少則曰室中無所觀吾目昏矣言

訖而逝十月二十三日也得年五十二用十二月權
窆于楊州注谷先塋側丁未十月遷窆于抱川松峴
村午坐之原公庚寅中司馬其年即筮仕所在必盡
職曰既食君祿不可以官微而不盡其責戊申子一
衡叅奮武勲推恩贈公通政大夫吏曹叅議公字叔
彬安東人太師幸之後自羅麗以來官冕不絕而多
名人鉅公按譜可見曾祖諱鏞左承旨贈吏曹叅判
以氣節著祖諱堦禮曹叅判考諱斗相僉知中樞府
事妣淑夫人全州李氏副提學之恒女配豐壤趙氏
右議政相愚女舉三男二女男保衡舜衡皆早沒一

衡文科持平女適趙重行俞彥國一衡一男一女男
緯女幼俞彥國一男二女皆幼夫以公之賢苟顯而
位乎朝必能克贊王猷窮而在下猶當推其所以
淑後學而今皆不然豈不重可惜哉公於余為再從
兄今於持平君之托義有不敢辭者謹叙其略而系
以銘曰

有粹其行有篤其學家庭之政施及宗族考德則多
命胡其嗇令子衡哀思永厥蹟有銘吾與彌久其晰
淑夫人豐壤趙氏墓誌銘

夫人豐壤趙氏禮曹判書贈領議政忠貞公諱珩右

議政孝憲公諱相愚其大父父尚州牧使李公諱長
英其外大父嫁為贈吏曹叅議權公益文妻生三男
二女保衡舜衡早沒一衡文科持平趙重行俞彥國
其婿也彥國亦文科未仕夫人十八而嫁嫁三十四
年而寡又二十三年而以乙卯五月二十六日沒得
年七十五祔葬抱川松峴村叅議公墓此夫人始卒
也夫人在家而為孝女最為牧使公所鍾愛凡所指
使咸適其意抑搔按摩必敬必謹牧使公每惜其不
為男子既嫁而為孝婦事舅姑盡其誠禮叅議公以
大夫人勤勞為戚凡尸饗幹盥請悉委夫人夫人竭

心殫力殫豆之薦既豐潔滫瀡之供極其旨甘事君子為順妻叅議公嬰疾數十年夫人斥賣釵環以供藥餌親視炮煎未嘗告疲亦未嘗以家事累公公能專意問學無外抗之間其慮者繫夫人是賴教諸子為義母其有怠於業者嚴辭警責不以慈愛而有所饒時舉歷代人物之得失是非旁及我東前輩所行論說疊疊至於事君之節行己之方充為之丁寧反復焉晚年持平君養以專城而衣服飲食稍加於前則輒不樂曰吾安貪久矣此於分無乃過乎處妯娌娣姒之間和不失其懽心取婢僕寬而指教有方

及夫人沒哭之皆失其聲夫人之行如此其可謂修
矣始夫人姿性寬和溫重人皆謂甚肖孝憲公而乃
其一生窮阨有人所不能堪者夫人能以理自寬育
孤御貧不失其道其視世之婦女怨天詈神若不可
以須臾者其賢又豈不遠哉持平君纍然縗服踵門
而丐銘婦人之德因文而著者也故叙其大而細因
可推云銘曰

婉彼女士善行攸萃克配君子薦成內治胡理斯舛
用蓄易社有季致孝神報靡忒詞以慰逝亦昭令德

貞夫人林氏墓誌銘

夫人羅州林氏始祖庇事高麗忠烈王官至上將軍
賜鐵券其後繁衍至我朝世有顯官曾祖諱快贈左
承旨祖諱端尚州牧使贈吏曹叅判考諱一儒僉知
中樞府事贈吏曹叅判妣贈貞夫人林川趙氏洗馬
錫馨女夫人幼聰明善事父母每諸兄讀書輒從傍
聽遂能通其大義及長嫁為贈吏曹叅判趙公妻禮
以事君子誠以奉舅姑内外交口稱賢婦舅梅窓公
每語諸姊妹是婦衆美既具且有福氣生子必能大
吾門母趙夫人能文有高識仲兄滄溪公泳每誦書
其側陳說其義夫人在傍時有論難滄溪公喜笑曰

若誠男子也顧不為兄弟知己乎辛未梅窓公沒丁
丑叅判公繼沒庚寅姑鄭淑人又沒夫人執喪哀毀
躬視祭奠而務致其誠絜已亥以後諸子連擢科甲
出入侍從夫人每戒之曰立朝事君當以忠直為本
居官治民必以廉謹為意無使家聲隳落身名污穢
又舉漢昭烈之言曰勿以善小而不為惡小而為之
願汝曹終身佩服壬寅獄起長胤在言地夫人語之
曰討逆固大義然或不無涉黨論者報復之際用律
必過中此不可不察也辛亥仲胤倖交河遷陵移邑
大役并舉夫人自京貽書彙錄進排諸節及後民鳩

材之策其料事精詳人所不及甲寅四月二十七日
沒于振威衙舍享年七十五祔葬叅判公墓右夫人
孝友之推而慈仁於物見人飢寒及貧不能辦婚喪
者惻然周恤唯力是視始滄溪公欲狀僉樞公內外
行實貽書夫人曰言行詳記吾不如汝吾願汝任之
夫人遂略記以歸滄溪公沒而有孫貧且窮夫人既
養育于家又畀以田之在湖南者俾資其業趙氏先
代連葬一山高曾既祧而尸祀者貧不能祀夫人曰
幽明無間享近闕遠奚安乎心每節加致奠需俾後
不替嘗從季兄爭經歷江都作江都賦備述丙丁忠

臣烈女之跡又作外先祖仙源金相公畫像贊廩其
忠節而夫人未嘗以示人也後乃得之遺篋夫人之
行可書者甚多今只書其大者如此四子尚慶承旨
尚鼎正郎尚命校理尚行正言梅窓公諱之耘叅判
公諱衡輔銘曰

婦人之德唯在於媚事尊章飭我酒醬苟其能是世
歸厥美孰若夫人不惟不愆明見卓識迴脫巾幗訓
子以廩直燭幾其明哲通書而識義理之源吊古而
感忠烈之跡嗟斯之德在今疇匹稱爲女士夫孰曰
溢

禮曹判書金公墓誌銘

生人之道在家而盡孝悌立朝而著忠勤如斯而已
矣學者所以學此者也學而至於足斯可謂成人矣
其或不資學而能焉者其天質之美必有大過人者
若近世大宗伯金公豈非其人歟子夏有言事父母
能竭其力事君能致其身雖曰未學吾必謂之學焉
者非公其孰能當之公登甲子文科選隸槐院陞典
籍移禮曹卽出為江春都事仁顯后遜于私茅公與
吳公斗寅朴公泰輔抗疏諫二公拷死而公亦屏居
久之間拜直講慶尚都事遭內艱癸酉制除兵曹

佐卽正卽出為榮川郡守甲戌四月中宮復位舊臣
次第進用而公首拜持平敢言無所避迺拜掌令弼
善差湖南左道京試官既復命除正言迺拜司書尚
衣院正 王世子冠禮時以執冠官蒙錫馬典連除

司僕寺正獻納差謝恩書狀官復命拜司諫俄特授
同副承旨陞左副迺拜襄陽府使周年病迺拜判決
事又出為驪州牧使旋以武倅差遣見迺拜刑曹叅
議承旨又出為安州牧使廟堂薦授義州府尹因特
命仍任壬午拜江原道觀察使諫官論啓請迺上不
允公力辭得迺御史自西關歸以治最一道聞命陞嘉

善階拜忠清道觀察使甲申除慶尚道觀察使入為
左尹兼同義禁移拜大司諫既適連拜工曹兵曹叅
判又為大司諫禮曹叅判京畿觀察使差陳奏副使
除戶曹叅判既復命除都承旨持平李世德疏論科
獄有遠竄命公陳啓請寢由此忤時議呈告得適出
為開城府留守乙未拜咸鏡道觀察使翌年以病乞
解大臣亦言公居官盡職勞悴成疾上愍而許之入
為左尹以疏斥申球見忤當路退居溪墅扁其堂曰
退脩丁酉復除京畿觀察使屢辭始就朝家新筭北
漢又議籌蕩春而移畿營公論其不便十餘条事遂

已秩滿除同知中樞府事庚子六月 肅廟昇遐公差
山陵都監堂上臺臣謂公引觴笑班請削職大臣明
公素不飲酒叙拜都承旨公於是職前後凡十二除
除江原道觀察使掌令李浣挾舊憾搆公避大議物
議駭之辛丑冬特除公戶曹判書兼實錄知春秋義
禁府事逆宦尚儉規害東宮公與諸宰求對請討正
言朴弼夔䟽論公事多做錯儒臣直公而斥弼夔大
臣又陳公善於其職且久任責成公前已差冬至正
使至是廟堂啓留之掌令李景說李廣道又以公吊
問李晚成啓請罷職德壽適官中丞䟽救公時議益

激公竟呈告逆以都監勞陞正憲差遠接使刑曹判
書又兼都摠管脩局堂上冬再判度支公陳疏力辭
上諭以度支之務非卿莫可甲辰公年七十八耆社
拜知中樞移禮曹判書右叅贊陞左叅贊公之所歷
官位止此其在臺地當甲戌改紀之初首論金元燮
等戕害相臣之罪又請嚴鞫賊臣趙嗣基以快輿憤
又論廢妃時大臣三司導諛之罪請施投畀之典又
論陳奏使申厚載創造悖語請加拿問又請嚴鞫張
希載謀害國母之罪曰王世子仁孝他日長成必不
以恩廢義又論庚申逆獄翻案之罪請竄金德遠等

又言前副提學朴世堂恬退之節清白之操可以激
勸頽俗况有子能樹臣節請加褒獎又論宮庄曰私
門之占益廣公家之地日蹙皇朝末年宮庄遍滿民
不聊生羣起為盜國隨以傾覆今不亟革前轍可畏
又論賊臣李義徵當死六大罪請亟正邦刑持平金
德基請罷副提學吳道一公言道一文學廉白罕有
其比殫文所列即權奸病國之事苟使若是其罪奚
止罷職凡公所言或用或不用而能不顧禍福隨事
正言識者韙焉在襄陽值歲大歉悉捐稅入魚菴資
粟以賑之民免流亡勸課農桑視民事如家事設雇

馬廳以除迎送弊民至今賴之安州關西雄府凋弊已極公節縮用度庫儲豐裕勅行存至而民不加賦夏大水青山面半百人口并滄沒人聞每夜鬼笑作求活聲公操文而祭自是更不聞鬼笑始忠貞公莅是府而御史廢以清如伯夷政似龔黃及公繼莅人謂克紹前烈云湖西歲荒多牛馬盜公文告列邑俾設紙牌其無牌者斷之以盜盜為之息良役徵族限其親踈富民甲利痛加禁斷營無親兵分取束伍移設牙兵悉括倡夫編於行伍置中軍操鍊而犒賞之士皆精銳可用嶺南煩劇甲於諸道及公視事案牘

如洗崇儒興學裁抑豪強及歸紀公政績於石者遍
各邑各驛皆然在秋曹民有失其家傳寶珠者刺臂
以識及得珠而與人就訟於法庭出刺臂為驗公責
之曰以珠而至於傷膚此物妖也珠若不碎後必有
殺身之患即令椎碎畿營囑托之類其來久矣公揭
榜嚴禁徵宿逋而杜假貸請於朝移賑廳穀一萬石
為營穀凡一歲所需及吏隸朔料取辦其耗官既成
樣人復改觀舊都凋弊公貸銀業市民罷京案軍專
屬本營收布以補軍需省費節用民力大紓及歸民
相率遮留既不得則繪像立祠堂以祀之北路俗蜀

夷或有利財而服他人喪親沒而不奔笑者公別勅
列邑痛糾禁揭法文布告使民知所趨避刊印小學
而頒布之多備軍需米布謹其儲藏俾報廟堂始取
用以防濫費在地部尤節浮費防奸蠹連經祠廟及
勅行而適官時記簿比舊有加公政術之見於施設
者如此丙戌旱甚公䟽請預講春賑而仍勉存心節
用言甚痛切申球投䟽構尹魯西宣舉謂之誣辱孝
廟當路大臣陳劄助之上始斥而終入其說公慨然
陳䟽曰昔章蔡之徒攻司馬光呂公著等一則曰誹
謗先帝二則曰詆毀先帝古今樂禍輩同一伎倆又

曰向年黨人欲罪宋時烈則曰貶薄孝廟今球欲陷
尹宣舉亦曰誣辱孝廟貶薄誣辱俱是人臣僭逆之
目時烈宣舉又皆當日禮遇之臣則此無異於誣孝
子以辱其父球而不罪無以懲後已友以蕩春筭城
會議朝堂公書陳所懷曰一都城猶以濶大難守為
慮而連筭二城反不慮其濶大難守夫丙子南漢之
不能保良以江都先陷三軍破膽故耳他日遇警大
駕保北漢而棄都城則賊必焚燒我室廬魚肉我生
靈百里外江都之失猶為南漢不守之嚆矢況目前
俯瞰之都城乎仍極論都城不可棄之意辛丑冬景

廟猝下世第代理之命庭臣屢日爭論而批旨非常
大臣四人即撤庭籲退上聯劄請講代理節目公與
前叅判李光佐等在朝房適趙右相叅考從宣仁門
入請對公等亦從之於是闕内外涵甚四相聞報色
然而驚從捷路疾趨入更請收回成命公進曰祖宗
三百年付托何等大事而殿下乃於即祚元年欲為
釋務自便之圖乎先大王乙酉傳禪之教因諸臣力
爭而還寢宣非殿下之所當法上即允所請人心乃
定而不悅者暗弩四張矣司果鄭亨益䟽斥私親祠
祭之非宜公䟽辨曰萬正淳問為君祭私母之禮朱

子荅以容有別廟春秋傳曰禮君為其母尊宮程伯
子曰所生之義至大雖當專意於正統豈得盡絕於
私恩今諸臣所請不過建躋立祠而已實不悖於先
儒之訓疏入報聞始掌令朴致遠劾論宣仁門入對
諸臣以為夜開北門手段至是儒生李義淵等受人
陰啖繼致遠而起踵相接也然人多顧瞻畏避不敢
明諭直斥公獨指陳明晰痛辨無諱此又公章牘之
播在人耳目者也乙巳四月二十八日告終于溪郊
之退修堂春秋七十一始葬公山雙溪洞壬子三月
移葬于積城羣芳谷忠貞公墓下子坐之原公端重

寡言笑外簡而內和雖在倉卒之際未嘗有疾言遽
色事父母有順無違朝夕在左右服勤不怠任夫人
晚有目疾公能先意承奉盥櫛甘旨之奉米鹽針絲
之微一皆以身任之如是者十年如一日任夫人甚
安之殆忘其疾任夫人病且革公斫指灌血及喪致
哀踰禮幾至滅性事丘嫂如事母嫂亦忘其非母也
撫諸姪均己子姪亦忘其非子也事庶母盡其誠禮
生則同爨數十年庭無間言沒必叅其忌祀至年艾
而不廢庶弟幼不使離懷抱病則躬護視以勸以教
卒使成立庄穀月俸必先分昆弟之家推以至於內

外族黨一接以恩義助其婚喪濟其艱乏唯視力之
所及盖公內行之篤有不可悉書書其大者而已公
諱演字士益金氏系出尚州遠祖需在麗朝官甫尹
入本朝有諱德誠號醒翁光海廢母后正議不阿至
謫斥仁廟改玉駁歷清要卒官大司憲謚忠貞寔公
曾祖祖諱高弘文館修撰考諱禹錫刑曹判書謚貞
穆妣豐川任氏贈左承旨衡伯女配貞夫人平山申
氏判中樞府事莊武公汝哲之女克勤克儉婦德甚
備屢從公外藩不以纖芥累公性不吝施與公之恤
窮睦親內助為多生後公一年死後公三年丁未四

月二十六日也。葬柩公墓左有一男二女。男東赫娶
領議政趙恭裔女。早夭。有一女取從兄判書東弼子
光進為後。女長適監役李道躋。不育。次適士人李運
坤。有繼子錫奎。判書手為公狀。托德壽俾為公誌記。
昔甲申公按察嶺南也。徵序於余。余以數百言應命。
大要媿公家行之淳而勉公推其得於已者以化民
成俗。後公屢按藩節。必以教化為先。不獨嶺南為然。
余固懿公之為而藏之心久矣。今於三十二年之後
又以不腆之文識公之藏。俛仰人世。益不勝殄瘁之
感。遂按狀序次系以銘曰。

商岳蜿蜒淑氣收聚薦降甫尹相麗胙土元帥奮義
大勲以樹矯矯醒翁際時昏憇抗辭扶倫狂流砥柱
允矣貞穆行羶德茂公承厥緒幼即端秀在家而孝
亦薦其友躬躬致養有順無忤孌眼虧明汝在吾觀
昆季有子謂公吾父孰為踈族均祖吾祖孰寒吾衣
孰飢吾哺家政既脩仕於何有陞續袖簡不茹不吐
旁角窺窺鱗鱗竄怖乃試政術于藩于府黃童白叟
式歌且舞紀德有石繪像有宇王曰休哉汝掌予賦
孰為讒舌競排迭怒有章痛辨厥慝靡售七十歸全
在古罕觀羣芳之原名祖是耐埋文垂蹟後人其慕

議政府右議政趙公墓誌銘

肅廟在位之三十八年其相曰趙公相愚當是時朝野無事民安其業而公之為相又一以重厚鎮物不喜紛更方與數三同志勉以破去黨論專意國家事未幾公去位而朝象潰爛遂不可復合識者至今恨焉始公初拜相入對便殿首請公好惡祛偏私上為之傾聽時有戶布口錢之議公劄言我國立規名分為重徵布之法不及士族麗季戶布至我太宗而始罷聖意固有在窮民思亂而不敢動者特以士族之叅錯其間故有所畏忌而然今乃拘囚催督使之

魚駭鳥散及成禍亂恐無善後之策上善其言其議
遂寢又言救荒之政如或緩不及時終為無實之歸
請抄綿田充歛之邑只俸今年身布而停舊未收者
又因赦言徒流以上并宜疏釋田租身布亦宜蕩減
以示同慶上并從之壬辰慶科後公請別設科慰鄉
生所取三人二為京儒而鄉籍者公啓拔其名皆公
親舊而公不顧也時闕元輔及左揆公獨秉政軸簡
諸堂之才者分畀庶務而自總其綱要以振紀綱抑
僥濫革侈俗保小民為先不自任其聰明而收聰明
之用時謂得輔相體因虹變劄請調用人才之登薦

者又請勅監司痛禁前賑過糶之弊夏病適拜判中樞府事癸巳領相李濡兵判趙恭永唱尊跽之議公進劄言昔漢光武始拒封禪而卒登梁父由當時羣臣不能將就美意區區老臣之意只欲殿下固執謙德終謝彌文無或如光武之無終先是俞相基以編書事與尹家構爭端而權黃江尚夏為序文盛詆尹明齋極上焚其文以直尹及是將換朝局而命還弁卷首又出補三臺臣論壬辰科獄者公上劄切諫不省繼有申球投䟽言尹魯西宣舉集中有誣辱聖祖語上察其傾險斥不受而當路相臣愆忠之竟命毀

板又命勿捧辨章公又陳劄諫曰即文而求其志其慷慨惻怛交修共勉之意有足以感泣義士孝廟受之而未嘗謂誣辱厥後五十餘年之間亦未聞謂其誣辱聖祖者突有申球弒出危言年少臺閣猶不忍顯右其說彼大臣激風波既定之後罪其人毀其板以實球言而事變極矣勿捧疏章既開後弊謫配儒生處分尤遽願察微臣將死之忱收回前命又不聽丁酉因辭廩屢有輸送命公復以疏陳情曰前秋毀板時惇光之諭士禍之說日登章牘大臣對辨不唯曰誣捏殿下亦唯曰誣捏臣果奉信不敢致疑於層

激之論廁聞近日所處分大相刺謬追奪之典并及
泉壤不意我殿下光御之日乃有如許舉措臣以前
日進言之人罪釁層積不敢開喙論列唯有辭廩辭
位以伸私義而已批旨顯示未安之意其秋上台左
相李頤命賜獨對多有非常之教既夕下備忘俾世
子聽政中外嚙嚙莫測其故公久而始知之流涕陳
疏曰殿下樞機一失衆心滋惑翻傳言語往往有不
忍聞者流播遠邇誠非細慮臣願誕蒞綸音明告中
外以向者之教出於輕遽今已快悔非有他憂為教
而益薦慈愛之念勿留芥滯之意則臣庶之疑可釋

東宮之心可安上即宣備忘如公旨而賜優批戊戌
夏宿疾轉甌公於恒日雖甚病不廢梳洗至六月三
十日日加午猶自力盥濯移時奄然而逝春秋七十
九訃聞上震悼輟朝賜東園秘器吊祭禮葬如例閏
八月丙寅葬于永平楸谷甲寅改葬于豐壤紫霞洞
申坐之原李夫人祔焉公字子直號東岡豐壤人始
祖孟高麗開國元勲為門下侍中平章事至本朝穆
陵朝有諱礪司憲府監察贈吏曹判書寔公曾祖祖
諱希輔分承政院承旨贈左贊成考諱珩禮曹判書
贈謚忠貞妣貞敬夫人泗川睦氏叅判長欽女公六

歲時仲嫂洪夫人抱謁鶴谷相公與之席不坐曰在
長者前不敢席也畀之帛俾製袍又辭曰吾雖幼儒
生也焉有儒生而衣帛者相公大奇之丁酉中司馬
遊於宋同春浚吉門同春甚期許戊申館學請以神
德王后祔廟是舉也異趣同辭而公為疏頭己酉世
子入學公又為將命亦士望所歸也壬子除翊衛司
洗馬甲寅肅宗即祚以宮官陞司畜別提出監漣川
縣乙卯同春被追削公與同門疏辨坐謫南平明年
宥還己未丁內艱服闋除戶曹佐郎出監秦川縣公
名論甚盛早負公輔望而顧久留落至壬戌冬始登

增廣文科甲子拜持平首論東萊府使韓構行已賤
汚又論執義李宏輕停重論上怒特遶公職差訓局
郎西學教授兵曹正郎承命廉問湖南薦授弘文館
副校理兼知製教移拜吏曹佐郎嘗因筵對請寢淑
儀房兩處折受又請蕩減湖西帖價米上皆從之瀉
莊烈王后玉冊陞通政因拜全羅監司因臺啓收新
資并遶藩任拜議政府舍人移副應教應旨與館僚
聯名陳劄余先大人論外戚及宮姬被譴公既伸救
而又請頻開講筵上并嘉納又論平安監司尹堦贓
汚不法黃海監司任奎按湖南時為嬖妄設神祀宣

化堂俱不宜畀以重藩奎陳疏反詈并及泰仁虛錄
事因是配楊州雙樹驛大臣有為公言者乃得釋丁
外艱已已服闋而朝著一變不復履宿趼矣由司導
正出為洪州牧使無何棄歸拜司成宗簿正左通禮
因微事罷叙拜司成出守瑞山郡甲戌春陞拜江界
府使更化之初南相公九萬筵白趙某不宜久置邊
地特命內移除禮曹叅議大司諫同副承旨又除吏
曹叅議兼承文副提調因旱災有甲戌竄謫人會議
疏釋之命公言如此則可否相爭必無了當之期宜
令刑官分別諸罪進之都堂聚議奏行然後三司舉

其得失又言外獄淹滯之可理役布侵徵之可革除
大司成副提學兼備局副提調擢拜開城留守以違
禁乘輜削黜叙拜大司諫上陳弊䟽請檢田以正經
界減額以均軍役因言吳道一文辭清白足以煥猷
勵世臺劾過實殊非通融用人之道批旨褒嘉拜都
承旨戶曹叅判兼同義禁府事又拜副提學因畫講
言當此儉歲兩宮修繕恐歸豐亨之舉新宮奴婢田
宅之價無所減亦有歛於聖德遂引漢文罷露臺事
勉戒承輝殿災公請對備言刑政失中又請命兩醫
司定醫官備藥物以救民間病癘者軍丁流亡一切

刊除改定軍案以紓民急并賜採納端宗祔廟上將
親臨公以都下癘氣方熾陳疏請寢上怒切責命罷
職不叙因玉堂劄救寢前命差思陵都監堂上移拜
京畿監司用封陵勞陞嘉義上民瘼變通疏凡三条
庚辰拜吏曹叅判兼同經筵嘗於晝講講易不遐遺
之義因言西北多人材如使五軍門擇補將校俾習
營陳節度歸為本土將領既有以聳動邊士之心而
兼有教鍊之益所謂操約而施博者儒臣有以畫師
工匠常留禁中為言者公進曰欲為器用則求巧匠
欲為繪事則求良師夫君德成就此器用繪事為大

乃不思擇人而任之乎無右副賓客李左相世白劄
論兩銓長薦望時傳言之誤持平李德英又疏訐公
注擬之偏辭適除刑曹禮曹叅判因枳益萬澤臺望
竟致公于理政院王堂爭之不能得仁顯王后喪差
山陵都監堂上未幾擢拜刑曹判書上賜後宮張氏
死公疏請全恩移拜右叅贊大司憲兩司方合啓論
南相九萬柳相尚運尹相趾完公引避見適諫院繼
論罷而上亦屢下嚴教叙拜知中樞兼都揔管知義
禁差僉使延勅灣上拜禮曹判書左副賓客王世子
手書問以孔孟出處公著說以對適拜左叅贊申領

相琬李左相畬謂吳公道一嘗侵辱宋同春嘗公不
絕吳公至關公銓望吳公既陳疏自明而公辨之尤
晰他日李相來謝前所言失實陞右賓客拜漢城府
判尹兼知經筵備局堂上丙戌夏特旨除判義禁府
事又拜兵曹判書林溥者鄉生也投疏言辛巳按鞫
諸臣不錄尹順命供辭中謀害東宮語上命設鞫覈
實詞証蔓延逮係者多委官崔相公錫鼎遂請從輕
重酌處及李潛疏出上謂初不能明蔽溥獄使此流
接踵而起命更逮治公內懷不安辭適金吾及本兵
丁亥戊子連拜吏曹判書嘗言於上曰今日諸臣所

達錢穀甲兵等事猶是末務若論其根本唯在自上
建中建極公用一時之人才同心僇力以做國事實
帝王為治之要也上曰非不欲保合而不如意奈何
及李觀命之疏劾崔相也上語侍臣曰吏判言誠有
意見果欲用之而此疏又出如是而國家事尚可為
乎己丑公入耆社再疏請致事不許庚寅公方提舉
內局而上忽有未安之教俄又并適三提調繼命削
黜事出倉卒莫知其所以致此者始崔公錫鼎為都
提調請乘聖候稍閑時接見大臣講究時務又請設
行大政無使遷就至是左相徐公宗泰上劄伸救而

微及其事上始因此為藥院諸臣罪於是新入兩司
之人合啓請罪崔公以迎合上旨大司憲俞得一又
謂公前冬病不叅入診筵劾公而鄭澔繼之竟削奪
叙拜判敦寧府事辛卯夏由禮曹判書逐膺大拜之
命時久旱是日甘雨沛然都民謂之趙相雨公纔經
重病不良於行及罷對超出幾顛跌上驚亟從小宦
扶出凡出入輦以為常云公長不踰中人而方面豐
軀儀容甚偉平居終日儼然危坐不跛不倚忠信悃
幅無一毫害物傷人心事親有至性忠貞公嘗患臍
下大腫公為吮其膿仲兄病革睦夫人將斷指以救

弼曹夏章二男二女命協命慎女適崔守誠次幼李
著亨一男慎濟德壽既按狀序次公事行而其小者
不盡載官屢經者非有事亦不重錄以為公隧道之
銘俾後有以信公之德云銘曰

古之為相惟大是務塗死不問錢穀有主降而不然
存心細瑣公惟識體分責僚佐俾職其職摠厥大者
綱舉目張事罔叢胜潭潭相府萬夫所趨桃李成蔭
芑苴潛輸公唯謙畏絕私屏權僮不添指屋不增椽
有閒其庭公在中堂其坐泥塑其和春陽世哀教弛
習與性長公敦其行化孚閭閻楊春友愛仲郢家法

推厥攸脩忠君憂國罄我腔血輸我章續秉勺無幾
疾病半之今也則亡後人攸思峙銘詔來用昭臣規

崔而順墓誌銘

吾友崔而順之逝今二十有四年矣二子繼死婦人
尸家家益窮困其墓木久已拱矣而無誌於壙無表
於隧非緩也勢也而順諱尚健海州人系出文憲公
冲集賢殿副提學萬理成均館直講慶昌繼仕本朝
以文行著名曾祖諱振海郡守贈左資成祖諱碩英
司導寺正考諱翼瑞敬陵叅奉妣順興安氏贈戶曹
叅判壽星女叅奉公之喪以毀沒朝家命旌其閭而

順年十七而孤十八而又失母二十二而持大父承
重服繼又哭妹喪即吾妻也十年之間無故者纔數
年耳其伶仃艱苦有如此者而能自力學不怠丙子
中解額戊寅己卯又連中壬午又連中監試別試其
中也多兩中或一等當是時名譽四馳遊場屋者咸
願一識其面及丁亥又持大母承重服既闋則年益
衰而功名亦晚晚矣然猶連歲庚寅辛卯解而卒困
於無成以死嗚呼豈非命哉余與而順少而同筆研
未嘗一日離也每朋遊萃集談論競起而順在其傍
若無聞睹者最後徐出一言以定其是非衆皆憊然

心服大化日而順據席而坐衆四面環而嚮之待其
落筆疾趨爭先觀或至就手中奪取而曾不色愠顧
且嘻笑曰文當自吾腹中出而乃覓人手中耶而順
於書汎濫無所不通自聖經賢傳外旁及老佛諸家
稗官小說尤喜卽易凡陰陽變化之理死生反復之
說皆能默契其妙其為文取材博而用意深清勁要
妙不染塵垢惜其為功令所奪不能究其業也其叔
父艮齋公絕愛重之嘗與論古今聖賢立言之旨諸
子同異之辯性命之源事物之則世運之升降文章
之高下靡不揚扆貫穿極其歸趣乃嘆曰汝之所質

於吾者少吾之所得於汝者多若殆非我輩人也及其死良齋以文哭之其詞甚悲其曰汝之受賦於天純善無雜孝友慈良溫厚醇謹口無擇言身無過行入則父兄愛悅以為賢子弟出則交遊親附以為良朋友者皆實跡也其沒以甲午三月十八日距其生戊申為四十七寒暑始葬利川新谷丙申改窆于陽城白蓮峰下丙午又移葬同麓丑塋之原孺人昌原黃氏祔焉有二男二女男裕興祉興皆秀而早夭女適正郎趙鳳命士人李德明裕興取從祖弟普興子粹麟為後女適士人閔孝達祉興亦取普興子粹熊

為後始吾哀吾妻之早死無後也以吾長女歸之社
興卒亦無後吾女與粹麟嘗請於艮齋請書其可書
者以為誌艮齋曰吾耄不可為也字呼余曰宜托之
仁老吾有哭死文是可徵也至是吾女與粹以為
言遂揮涕而為之書如此艮齋公諱奎瑞官領議政
為世名臣銘曰

天之道窮於其身不窮其後既窮其身又窮其後文
學高世而曾不一售兩兒補家而苗而不秀奚嫉才
高奚憎德厚高穹黯黯奚從而訴鬼神沉沉奚路而
叩惟是艮齋之文仁老之銘其尚能使公而不朽

崔祉興墓誌銘

君名祉興字汝吉亡友崔而順之次子而吾之長女壻也母黃氏佐郎鐸之女其生以乙亥八月十五日死以乙巳五月十八日嗚呼短哉君稟氣清弱若不勝其衣也言語重澁若不出其口也然文思清壯有古作者氣喜從先輩長者訪問古事嘗從余讀書凡文義有盤錯必深思默究得而後已或舉以問於余余多不能對茅告之曰陶元亮讀書不求甚解若胡滯之甚也薦於行誼其兄嘗在鄉遘厲君以父命不敢往視而寢不解衣帶食不御滋味者數月及其兄

病愈相見而後始復常甲午遭父喪號泣人不忍聞
一日之內隕絕者屢繼遭二妹喪既祥而兄又死哀
傷成疾頗失常性黃孺人泣曰兒自幼慕父母異甚
得一味輒忘其口而惟父母之遺既長未有一事忤
父母意者淡於物欲無一毫累其心唯於文字見解
穎異非他兒所望然以其清羸善病故年踰十歲猶
禁其讀書父愛念之每出久未返必出門而望其歸
也今胡至於此聞者悲之乙巳夏病益瓴却藥不肯
服曰死期至矣服藥何為遍呼家人若告訣然俄麾
使出命傍人正席而沒哀哉吾女嘗丐銘於君之從

祖艮齋相公公既許而未及為也及公沒女又泣而請於其父昔蘓子美之妻號泣於其父杜祈公曰吾夫屈于生猶可伸于死屈于人間猶可伸於地下吾女今日之情即杜氏當日之心也其忍孤其望乎遂出涕而許之凡君世闕已具於而順誌茲不備載云而順諱尚健艮齋公諱奎瑞銘曰

其姿玉雪如也其文錦繡如也惟薦於孝友竟死於孝友後之君子尚加哀傷勿以鋤犁或犯其塋

禮曹叅判黃公墓誌銘

故禮曹叅判黃公諱甫章字子聚湖南之長水人也

其先出於新羅侍中瓊至麗朝曰公有棄官避李義方之亂曰鑑平弭逸齋見名賢錄又歷二世逸其譜曰君瑞判江陵府事生喜相我世宗大王致太平卒謚翼成配享廟庭生致身行戶曹判書以五子登科贈右議政謚胡安又五世吏曹叅議贈吏曹叅判廷式無子取弟長溪府院君廷或子奭為後官承文院正字贈司諫院司諫又三世而至于公源遠流長數名族者歸之公持身清勤自蔭仕至卿宰四十五年所至皆有政績而視其所居則陋室弊席甚於寒士僮指此初年不增一人泊然無所營為以是終其身

春秋七十六葬于交河金蠅里壬戌之原公幼秀異
不凡金叅判始振嘗指庭槐命公賦詩公應聲曰大
木直天高風來枝葉動金公甚賞其氣像早失父母
娉仳孤苦而能自力學凡書過目輒成誦辛酉中司
馬甲子除恭陵叅奉陞司饗院奉事宗簿寺直長義
禁府都事出監同福縣丙子由地部郎又出監順安
縣辛巳以秋曹郎董明陵復土之役出守朔寧善山
郡庚寅除工曹正郎移漢城庶尹未準朔選部啓授
平壤庶尹公文詞敏給每庠試能自製自書屢入格
壬辰遂擢庭試先進期許甚重不計其衰也移拜安

州牧使道伯書最曰箕民惜去安人歌暮甲午內遷
司諫院正言論重臣及講官之昏謬猥雜者乙未除
掌樂院正選為嶺南散差官未復命除侍講院弼善
又除司憲府掌令論鄭澔趙尚健護黨毒正之罪大
為黨人所嫉果遭削黜屏居江村轉寓陽城邑底與
內從兄艮齋崔公奎瑞相依辛丑除司成移軍資監
正又移侍講院輔德連擬司諫執義斬黜趙領相恭
耆請於三品中選擬堂上首以公陞差戶曹叅議移
同副承旨叙陞左副出為全羅道觀察使癸卯以季
子最官侍從推恩陞秩嘉善甲辰以大司諫承旨時

有官婢獄公擧諸僚守閣請查病逆旋除戶曹叅判
兼副摠管同知義禁府事由漢城府右尹出為江華
留守政尚寬簡務持重不苛府多武士每一校有窠
百人鑰求公翔校藝之制中多者得之一府頌其公
乙巳以承旨叅鞫時事被削黜一掉泝洛河將歸于
交河新留守朴師益聞公只持一日糧具糒饌追濟
鄭祭酒齊斗語人曰吾居沁久閱官多矣清約不求
人知獨見黃子聚府啓復搆公罪竄之鐵山丙午因
赦特放諫官爭數月不止上終不允丁未東還寓交
河之田舍秋除同知義禁府事差冬至副使以老不

任遠役陳章得適俄除同知中樞府事戶禮曹叅判
并辭適戊申春感微疾三月初一日告終無戚戚之
容無顧戀之言翛然委化君子稱其達焉公器宇寬
厚邊幅濶踈坦率任真與俗異趣其居官尤有古人
愷悌之風對吏民辭氣溫然載色載笑已忽斂容肅
然其嚴冷若不可犯左右無不震恐至不敢仰視蓋
其寬猛互施要以濟吾之政而已是以其在外政績
尤多可書者在同福理清訟平官以無事則貧而廢
農者備種與糧而勸其業男女有婚嫁失時資其衣
衾俾不愆期儒生則以身為師而課督不懈在順安

海州崔氏郡守贈判書振海女娶安東金氏江華府
經歷世輔女性端慤治家有法先公二十五年而沒
生四男一女男長旻山陰縣監次昱尚瑞直長次晏
早夭次晟文科大司諫女適士人李浚側出二男星
晷公宰順安日先君子按關西節每與公語未嘗不
移日既退又未嘗不惜其久屈于吏也先君子下世
十四年而公始擢茅今公沒且十年而余亦老矣俛
仰人世不勝今昔之感謹因公諸孤所托畧記公官
世行治以掩諸幽以告于後之人云銘曰

黃出長水泝遠而洪自羅洎麗世有名公嶷嶷翼成

相我世宗功存澤民德稱有容餘慶綿綿逮于公躬
公由吏起奮厥績庸紀其垢芟噓以雨風耆幼謳歌
禾麥芄芄翼翼有堂公像在中或篆于石亦鑄以銅
通籍雖晚亞卿之崇功名累人多取為凶奚恤吾化
浩然歸終金繩之原有幽一宮飭昧有銘刻視無窮

趙同知墓誌銘

趙君甫昌為其父母乞銘於余三年而不懈益勤孝
子之心也序而銘之曰君諱俊者字台老湖南之淳
昌人以高麗檢校大將軍璋為始祖以贈右尹諱璵
為祖以穩城府使贈叅判諱元弼為父母完山金氏

龍驤衛副護軍慶瑞女叅判公之副室也丙子生君
於盱江鎮甫婉而叅判公病逝扶櫬東歸至松都虜
騎倏忽蔽野一行攀號賊睨而過遂窵於高陽大才
洞既長為母之多病也不能遊學嘗留意軒岐術而
亦不能卒其業每舉以勉諸子長子得山谷詩及莊
子書愛誦之君驚曰以此而求售於有司如食烏喙
覓飽奚瘳之早也為手寫李白及唐人詩畀之曰此
足為若作詩之程矣謂少子有講才授以經而勸課
之屢赴幕招以賑飢勞再陞資至嘉善丁丑三月十
五日病終于家得年六十二始葬高陽磚石峴辛亥

十月移窆於水原金水里栢山壬塋之原配始興姜氏仁憲公耶賚之後而監牧官炫之女資性柔淑奉祀以誠遇宗黨有禮見丐者輒哺而飼之無難色聞二子讀書聲輒喜甚曰此吾家簫管聲也性喜盥濯老而齒髮不衰行步翩然諸子嘗欲上言要壽爵呵而止之曰吾以一婦人寧可以欺君冒榮槩滿百而請壽職國典然也以乙卯六月十一日終壽九十五其十月柩于水原之阡有二男四女男長甫昌學官有文次甫完僉知女皆適人銘曰

生也美之合沒也坎之從槩槩二子之慕爵爵四尺

之封吾銘在是其傳無窮

兵曹正郎沈君墓誌銘

君諱游義字宜甫青松之沈皆祖青城伯德符族大
而門高至君曾祖諱瑞肩以蔭為原州牧使祖諱得
元文科侍講院弼善考諱壽榦無子取從祖弟進士
壽根子為子即君也妣廣州李氏校理漢命女本生
妣安東權氏大司成煥女君為人慈仁精剛敏而好
學卽翁經世書世稱深奧難解而能神領意會辨說
無碍善事父母疾病致其誠奠祭盡其禮羣居族虞
未嘗戲笑侃侃自持儕友咸憚之景廟三年癸卯擢

增廣試第二名例授宗廟署直長既滿朔矣有所不樂
棄不仕丁未因筵臣言陞付司果戊申始除成均館
典籍移禮曹佐郎兼春秋館記事官既入侍命輪讀
所講書其聲琅然舉止又雍容 上為之傾江以末
擬除兵曹佐郎已酉出為慶尚都事以親病辭遶秋
復入騎省陞正郎兼管軍色善於其職除北路京試
官病不赴旋除咸鏡都事以受由踰限坐罷叙拜嶺
南敬差官又以親病辭遶庚戌獄起君遂被逮矣始
君連姻家奴有妖惡者在囚為死中求生詐既告其
主又并告常時來往人以實之然其言前後違戾了

無証據尸獄者不之察惟奴言之信君竟拷死獄中
人皆冤之是為十二月二十六日君既死得血書衣
袖間蓋告訣於父與兄與妻者又各有詩其辭甚哀
乙卯春靈城君朴文秀首諫公冤狀而右相宋公寅
明繼之判金吾金公東弼又繼之上為之惻然曰庚
戌獄頗濫予至今追悔沈某誠矜愍而死者不可復
生在今伸雪唯在復官於是遂追復君官爵嗚呼君
於是乎可以瞑矣辛亥二月葬於龍仁縣西佳山里
坐乾之原配淑人鄭氏軍資監正行五女寬和識義
理當君受禍始欲殉君同死及得君臨終書遵君立

後奉祀之命遂定以不死三年廬君墓既又再上言
訴君寃終能感回天心以開納諸臣言其亦賢矣君
無子以兄游仁子櫟為後亦君遺命也淑人教養甚
勤及長娶叅奉李善源女於是淑人乃曰吾今可以
死矣悴日益甚遂至於盡君忌之前一日也塋祔君
墓余與君有族誼每愛其端飭及君死又未嘗不致
疑於福善禍淫之理今游仁具君狀屬銘曰將以慰
後死者之心且以曉來世余不忍拒也銘曰

世有大菑子獨先罹斑斑者血決絕有辭寃矣酷矣
鬼神為悲天高有眼降監有時冥冥九泉子寧有知

替替其精辯辯其儀遠矣隨日曷其能思藏魄有丘
尚哀庇之

修撰呂公墓誌銘

咸陽之呂其來遠矣在唐禧宗乾符中自萊州避黃
巢亂泛海東來我東之有呂姓始此其後有諱林清
仕高麗為大將軍死葬咸陽遂為咸陽人至都統制
靖平公諱稱始仕本朝歷六世曰裕吉官漢城右尹
贈左贊成曰祐吉公洪道觀察使曰裊吉訓鍊院都
正贈兵曹判書兄弟并顯于時贊成公子諱甬徵官
吏曹叅判藝文提學贈領議政弟諱甬亮官仁川府

使贈吏曹叅議承其後者曰議政府領議政諱聖齊
盖叅議公以都正公子為後於觀察公議政公又以
叅議公子為後於贈議政公兩世皆絕而復續議政
公有子諱必升有志行早沒娶完山李氏奉事敏及
女是為公考妣公稚年祖妣姜夫人嘗私與佳柿曰
數少不能遍及故唯汝之貽公對曰雖少猶當分奈
何獨食固辭不受夫人甚竒愛議政公以兵曹叅判
退居仁川殿最日府隸致堂饌家人將受之公曰辭
官在鄉惡用受官饋丁卯并中司馬兩塲翌年勤議
政公於慶源家有馬乳種議政公所嗜也公見其熟

熟齋以自隨在道而爛不可致自食不忍與人亦不忍遂泣而埋之地辛未遭議政公喪壬申又遭姜夫人喪前後居憂禮無違甲戌服闋除康陵叅奉以未強仕不肯就戊寅復除社稷叅奉己卯以莊陵監造勞陞授司畜署別提由義禁府都事遷工曹佐卽出監鎮安縣乙酉移除全州判官全為大府素稱事務之煩而至公為之則沛然嘗有餘暇乃不廢綴文射帙謂倉無見貯之穀無以備水旱城據平地寇來不可守乃節縮得穀數千斛峙兩倉而貯之一則依常平法秋增價而糴春減價而糶使無穀價踊貴之患

且為荒歲賑備一則為異日版等費以府有甄萱故
山城緩急易以入保也崔相國錫鼎聞而歎曰穆陵
朝昇平久矣然趙重峰勸申恪修延安城卒獲其力
於壬辰今誰之勸也而欲修此城賢於古人遠矣破
豪強養戶徵奸吏耗糴濯瘼煦寒威惠并洽近古稱
善治以公為首御史監司連啓其績有陞叙命棄歸
坐罷己丑叙拜丹陽郡守旋擢謁聖文科連除侍講
院司書文學司憲府持平䟽請破朋黨揀賢才恤民
隱修軍政又取國朝名臣奏議關於時政者每段附
以己見備論經國大務作冊子以進上賜批嘉納辛

卯又以正言陳䟽論白骨徵布之弊請亟釐革又言
沿邊守宰勿專用武臣京司殿最必考其績無循近
例上又賜批嘉納又言王子宮買龍仁田庄致有訟
端而別降判付深為聖德累言甚剴切上又嘉納命
宮家勿買而歸其訟於有司以考試遭臺噴吐罷叙
除司憲府掌令違牌罷癸巳薦授弘文館校理又選
知製教凡違十二牌得罷叙拜修撰冬以繡衣廩問
嶺南右道究弊詢瘼條奏甚詳連除弼善修撰公素
多病及肅廟違緣日久每自力承候母夫人宿疴又
歲曉夜操藥寢食殆廢子弼諫其如此輒曰君親之

憂一時并萃雖欲自寬有不可得甲午六月十五日
暴疾卒享年四十九八月葬于楊根郡西水青洞子
坐之原公幼而失父事母夫人克敬克孝凡其所欲
先意承奉乃至飲饌烹飪亦皆身檢暫違其側候問
之使踵相嚮也及其有病其色焦然其容遑遑湯粥
之供非手不進家人侍疾久而或怠見公所為無不
惕然加意祖母姜夫人法外離異公每戚於心滂泣
乞申情事竟得追頒誥命得如其志一妹友甚絕甘
分少其或有苦憂形色辭妹曰以我之病悴兄若此
吾不吾病之恤恤為兄恤乎居與物無競非理見犯

能以理遣見人過必好謂退又未嘗洩也與朋友處
不設情容有事必諮十反不厭務求至至當嗚呼其
可謂爲行君子矣公諱光周字師仲配延安李氏內
翰潤朝女月沙相公之玄孫甚有賢德公嘗自爲墓
文育一男二女男善長文科承旨女適尹東浚李挺
楷繼配全州李氏通德郎孟大女生一男一女男善
明女適李夏行銘曰

公古人才亦古人行其才伊何完府之政鰲老謳歌
蟲螽黜屏峙穀穰穰紉法井井用埃版筭用備旱肯
先民有謨在今可鏡口出奚啻遠猷宜省其行伊何

謹我溫清腆我就養殫我愛敬焦然其色愈在寢病
王母非罪孰謂我請天感孝孫有煥誥命德則多有
命胡不永鬱彼楊阡松柏森映撰文勅後渟云其迺

西堂先生集墓誌銘卷之二

卷之七

命時不木轉而歸仁公計者知歸反故對中其
主母非罪而歸死計元漁者惡其歸而歸其
送其歸而歸死計元漁者惡其歸而歸其



